


原  
故  
文  
錄

詩  
一  
卷  
附

DS  
793  
S452  
S357  
1880  
v. 5









原故文錄



光緒屠維單

閏陽月開雕



# 原故文錄序

邑志載藝文所以徵文也然略  
則遺泛則雜吾秦前明諸名志  
無之此義也麟竊取之矣其不  
可闕者見志本事餘則別輯焉  
此原獻文詩之所以錄也顧猶



有關於邑故而可資考證者復  
為之編次顏曰原故文錄亦使  
後之人得以詳覽云光緒庚辰  
初秋既望賀瑞麟復齋甫



原故文錄目次

蔣儼

與田游巖書

權德輿

都督李公神道碑銘

韓愈

襄陽郡王平陽路公神道碑銘

顏真卿

右武衛將軍上蔡侯臧公神道碑銘

韋端符

李衛公故物記

扈蒙



新修唐高祖廟碑記

同 毅

李君義行記

王 磐

冀國公郝公神道碑銘

蘇天爵

張府君墓碑銘

吳元喆

清河伯張公碑銘

董 立

重修文廟記

高宗本



西園草亭記

李東陽

端毅王公神道碑銘

沈周

西園八詠賦

張奎

創造文廟祭器記

林洪博

三原縣舊志序

王世貞

送溫一齋入領左司徒序

葉向高



恭毅溫公神道碑銘

尹伸

創建三原縣校士館碑記

傅振商

重建學古書院記

張縉彥

公理郵政記

馬御輦

龍橋賦

劉漢客

過鑒硯齋記

葉映樞



重修學宮記

李顥

慤叟李公傳

李因篤

陳素中傳

李瀛

重修三原縣志序

張象魏

創建普濟堂序

重修學古書院記

新建綠莎行署記

重修縣治大門記



原古文金  
重修三原縣志序

崔龍見

學古書院增膏火記

九畹文集書後

李元春

李善人傳

補遺

康海

光訓堂記

詩附

宋之問

一首



韋應物

一首

張籍

一首

歐陽修

一首

李夢陽

四首

康海

三首

王九思

一首



何景明

二首

喬世甯

一首

馮從吾

一首

王世貞

一首

楊恩

一首

金銑

八首



駱復旦

二首

鄧漢儀

一首

王士正

一首

李因篤

三首

許蓀荃

五首

張象魏

二首



王燕龍一首

張象一首

余庚陽一首

符英十三首

張象一首

李因兼一首

王世貞一首

王士五首

楊一一首

澄莫難一首

王世貞一首

原故文錄目次終



原故文錄一卷

知縣焦雲龍鑒定

邑人賀瑞麟編輯

唐  
蔣儼

與田游巖書

足下負巢由之峻節傲唐虞之聖主養烟霞之逸氣守林壑之  
遯情有年載矣故能聲出區宇名流海內主上屈萬乘之重申  
三顧之榮遇子以商山之客待子以不臣之禮將以輔導儲貳  
漸染芝蘭耳足下受調護之寄是可言之秋唯唯而無一談悠  
悠以卒年歲向使不食周粟僕果何言祿及親矣將何酬塞想  
爲不達謹書啟予

權德輿

字載之畧  
陽人諡文

都督李公神道碑



周道親親夾輔王室分唐叔以懷姓九宗職官五正故其後文  
侯受秬鬯之命文公受大輅之錫祿勳推恩敦敘昌大理道之  
繇也國家憲章文武選建明德元功侯籍延耀本支初太祖景  
皇帝之友曰鄭王亮實生淮安王神通用親功德左右休運淄  
川郡王孝同淮安之昭也右衛將軍燧淄川之穆也劍州長史  
贈太僕少卿廣業承祖禰積厚之慶而生尙書尹三王都總六  
師帥八命四履投難服勞有猷有守以至昭代禮賁於追命澤  
流於代官有由然也尙書諱國貞字南華天姿風采爲宗室儀  
矩冽如寒泉嶷若崇山修身筮仕動有休裕開元十三年明皇  
帝肆覲東后柴于岱宗以公族侍祠調補綿州參軍事暴雨忽  
至江流羨溢公自下位能禦其災暨堅舊防乃復故道累遷岐  
州錄事參軍太師苗公太尉房公繼爲二千石皆所引重御史



大夫張倚採訪關中表爲支使天寶末林胡覆三川犯秦關詔  
除殿中侍御史爲襄陽郡司馬且介戎政公以侍板輿辭革車  
換房陵太守表課尤異徵拜長安縣令風政肅清改秦州刺史  
命或中止復爲長安令尋遷汴州刺史未及行復輟爲京兆少  
尹天子以公積有試効可居大官累命爲河南京兆成都尹劍  
南西川節度使其撫周郊獫狁方熾公與太尉臨淮王議曰河  
洛爲天下衝且無車賦比屋安堵寇將甘心焉不若虛其邑居  
挈以駿邁贏糧善地可俟師期繇是太尉壁河陽公次於陝伐  
謀銷患君子推其智其在京轂兵火之餘人命將沉物力亦屈  
而百役煩苦出於傷痍公曰元元愁嘆受命惠養儻不曠然不  
變豈副明天子鬱悼之心耶列上蠲除悉蒙可報凡調於人者  
去其十九清淨愷悌百姓稱其仁鎮岷峨裔人樂禍殺嘉榮二



州刺史以開邊隙公命將疾攻舉無遺類明年昆戎圍我三城  
遣銳師據便城壁戒嚴持重徼其極而擊之賈餘無前酣戰盡  
殪悉獻虜獲軍無私焉鄰壤不靖偏師畔換將盜兵符已據城  
寺出車壓境指顧而平凡三整五經而巴蜀軌道拊循安重四  
封畏其威柄用者沮公勳猷徵爲殿中監命書旣下不俟駕行  
囊被單車無道里費取倍稱之息五萬甫達京師上嘉而賜之  
俸折其券寇有段子章者恣睢就戮方帥以告語聞詔公晏見  
前席獎與曰利兵積穀皆卿之素也其無駭庠父之謂乎朝野  
嘉其首公而服其潔已臨淮王移鎮海岱長轂在郊西邊北朔  
合淮陽圻父五諸侯之旅主盟中權盡護諸將於是拜戶部尙  
書河中節度都統使又以職顯戎重則風俗不阜加管內觀察  
使權知絳州刺史公外總方畧內修班制當強弩之末無半菽



之糧不忍加賦飛章未下猶以憲度爲己任椎剽者斃不行師  
諸校譸張缺望至是夜暮變起或以跳驅諭公公曰吾之不敏  
當死節官下安敢二偷以煩刑史亂之剡也公竟及焉議者尙  
其絜矩而哀其不淑時元年建卯月春秋四十八是歲改元寶  
應至夏五月甯神於三原縣之北原詔以揚州大都督印綬告  
第憫其勞也公本諱若幽上元中天子以特立之操爲宗公表  
率錫嘉名以更焉公忠儉誠厚方嚴密靜用儒行憲令修明事  
功大玉不剡楚金必割凡歷官二十四自解巾至握節勤職十  
七其以內庭特書中執法亞丞相佩兩印以雄外服者又七命  
焉刺房陵之後五六年閒車不輟鞅賦職任功名聲章明及公  
以司徒總輿師令弟若水以內府司贊謁而太夫人福履所介  
也陳壽觴懷黃佩玉左右穆清極魯侯之燕喜邁張仲之孝友



宜錫壽爲人倫龜龍曾未中身遭罹凶害前史稱霍去病亦有  
天幸然則命之所賦有幸焉不幸焉斯不可問已夫人扶風  
郡君竇氏鴻臚丞光之女揚府史御史大夫覲之姊也淑明仁  
順克叶公志家肥族睦抑有助焉公薨若干年而夫人歿子四  
人長曰騎材睦器碩茂潔廉貞肅遵修訓則復大其門入作卿  
士出爲侯伯貞元十五年以御史中丞剖符潤州宣風以宏禮  
俗成賦以殖財用大績茂中邦賴焉明年就加御史大夫十八  
年進禮部尙書撫封題劍如公渥命次日鎰蘄州刺史次日豐  
士鄠縣令幼曰豐器長安尉皆有幹裕而屈於年位今尙書永  
維先公丕矩未刻金石以德輿嘗叨史職久掌贊書知王族大  
僚之事業見託論譔故不敢默其美亦不敢溢其言銘曰堯睦  
九族漢封同姓烈烈淮安乘時佐命淄川而下三葉儲慶乃生



我公紹續先正時惟宗英忠智廉清所至風行所居理平山元  
朱組旣靖蜀京鉞鉞琕戈乃主夏盟交修藩衛纂服宏大陟恪  
左右勤勞翼戴隱微之間乃與禍會夷途始半白晝中晦桓楹  
羽葆久閱鮮原煌煌密章肅肅絲言盛德復祉叢滋後昆列郡  
是式价人維藩大江南服考禮修職五曹十聯克嗣先德董是  
經費陳之藝極本於教中懋此宣力伊昔祭器實銘烝彝禮則  
有變魂逝在茲連岡陂陀宰樹參差悠悠終占永揚斯碑

韓

愈

字退之南陽人諡文

襄陽郡王平陽路公神道碑銘

惟路氏遠有代序自隋尙書兵部侍郎諱袞四代而至冀公冀  
公諱嗣恭以小邑蕭關令發聞開元受賜更名書於太史治行  
靈州終功南邦享有丕祉紹開厥家官至兵部尙書封冀國公



範贈尚書右僕射司空公諱應字從眾冀公之嫡子用大臣子  
謹飭擢至侍御史著作郎選刺虔州割餘零都作縣安遠以利  
人屬鑿敗灘石以平贛梗陶甓而城罷人屢築詔嗣冀封又加  
尚書屯田郎中進服色遂臨於溫築堤岳城橫陽界中二邑得  
上田除水害拜尚書兵部郎中兼御史丞淮南軍司馬改刺廬  
州又甓其城人不歲苦入爲尚書職方郎中兼御史中丞佐鹽  
鐵使使江東有功用半歲歷常州遷至宣歙池觀察使進封襄  
陽郡王至則出倉米下其估半以廩餓人蜀闢誅行軍千五百  
人於蜀李錡將反以聞置鄉兵萬二千人錡反命將期以卒救  
湖常坐牢江東心錡以無助敗縛作響山亭營軍於左右權丞  
相善之鑱其說響山石居宣五年以疾去位校其倉得石者五  
十萬餘府得錢千者八十萬公之爲州逢水旱喜賤出與人歲



熟以其得收常有贏利故在所人不病饑而官府畜積元和六年天子憫公疾不可煩以職卽其處拜左散騎常侍以其祿居其歲九月望薨於東都正平里第年六十七明年葬京兆萬年少陵原夫人滎陽鄭氏祔旣其子臨漢縣男貫與其弟賞貞謀曰宜有刻也告於叔父御史大夫鄜方丹延觀察使恕因其族弟進士羣以來請銘遂以其事銘曰冀公之封維艱就功襄陽繼大啟慶自躬於虔洎溫厥緒旣作以及職方遂都邦伯朝夕人事下完上實師於其鄉鄰寇逼屈營居響山牆屋修施哀功刻表丞相之辭受代而家敘疏及邇病不能廷食祿卒齒凡代大家維艱其保旣顯旣願戒於終咎伊我襄陽克慎以有延畀後承莫不率守有墓於原維樹在經以告無期博士是銘

顏真卿

字清臣琅琊人  
封魯公諡文忠



右武衛將軍上蔡侯臧公神道碑銘

公諱懷恪字貞節東莞人其先出於魯孝公之子樞字子臧大夫不得祖諸侯其孫以王父字爲氏僖哀二伯旣納忠於魯鼎武文兩仲亦不朽於言哲丈人成功而遯迹子原抗節而捨生義和辭金飾之器榮緒奮陽秋之筆賢達繼軌紛綸至今曾祖滿隋驃騎將軍祖寵皇通大夫靈州都督府長史父德朝散大夫贈銀州刺史威務遠圖克開厥後恤肩之慶世祀宜哉公卽銀州之第三子身長六尺一寸眉目雄朗鬚髯灑秀雅善騎射尤工尺牘沉靜少言寬仁得眾奇謀沖邈英勇冠倫友于兄弟謹爾鄉黨每敦詩而執禮不苟柔以吐剛莅事而剖判泉流臨戎而智畧鋒楚古所謂文武不墜高明有融者焉少以勳勞亟紆戎級開元初嘗遊平盧屬奚室韋大下公挺身與戰所向摧



靡繇是發名元宗聞而嘉之拜勝州都督府長史銳精佐理絜矩當官朔漠不空邊隅用乂俄拜左衛率府左郎將轉右領軍中郎將兼安北都護中受降城使朔方五城都知征馬使戎事齊足十萬維羣我伐用張軍威以肅由是深爲節度使王腹所器奏充都知兵馬使嘗以百五十騎遇突厥斬啜八部落十萬餘眾於狼頭山殺其數百人引身據高環馬禦外虜矢如雨公徒且殲遽而紿之曰我爲臧懷恪敕令和汝何得與我拒戰乎時僕固懷恩父設支適在其中獨遮護之諸部落持疑不肯公割羊以盟之仗義以責之眾皆感激由此獲免遂與設支部落二千帳來歸後克河西軍前將盤和安氏有馬千駒怙富不虔一族三人立皆毆斃軍州悚慄疇敢不祇俛爲節使相國蕭嵩所賞後充河源軍使兼隴右節度副大使關西兵馬使拜右武



衛將軍吐蕃不敢東向者累年俄封上蔡縣開國侯開元十二年歲次甲子春二月二十有六日薨於鄴城之官舍享年五十六其年八月二十三日詔曰故具官公頃以幹能亟承任使操行逾謹勞効未酬不幸遷殂良增乃悼可贈右領軍衛大將軍卽以其年冬十月庚戌遷窆於京兆府三原縣北原禮也嗚呼公兄左羽軍大將軍平盧副持節懷亮以方虎之材膺爪牙之任孔懷斯切致美則深七子游擊將軍崇仁府折衝希崇豐州別駕贈宋州刺史希昶左武衛將軍朔方節度副使贈太子賓客希忱右衛左郎將劍南討擊副使贈汝州刺史希愔右驍衛郎將靖邊軍使贈祕書監希景甯州刺史左金吾衛將軍贈揚州大都督希晏開府儀同三司行太子詹事兼御史大夫邠甯山南觀察使集賢待制工部尙書渭北節度使魯國公希讓等



夙漸詩禮恭承教義芬潤挺蘭玉之姿英威轡虓闕之質而希  
讓識度宏遠器謀沉邃仁親以孝殿國以忠綽裕冠於人倫勲  
勞懋於王室至德中今上爲元帥東伐肇允押牙從收兩京陟  
降左右入侍帳幄旣崇翼戴之功出擁麾幢載叶澄清之寄加  
以篤睦羣從紉綏宗族吉凶瞻恤終始無渝行道之人孰不嗟  
尙肅宗以公有謀翼之勤乾元三年春三月贈魏州刺史寶應  
元年冬十月又贈太常卿廣德元年冬十月詔曰孝以立身可  
揚名於後代忠能事主故追榮而及親開府儀同三司兼御史  
大夫元帥都虞侯魯國公臧希讓亡父贈太常卿懷恪業茂勲  
賢地華簪紱佩忠信而行己包禮樂以資身守節安卑幽貞自  
處養蒙全正聲利不營雖與善無徵促齡悲於逝畧而積善垂  
裕餘慶光於後昆故得業濟艱難功參締構出有蕃條之寄入



多爪牙之任位以德遷禮宜加等父由子貴贈合超倫載登八  
座之榮式慰九原之路又贈工部尚書褒異之典於斯爲盛臧  
氏自驃騎而下世以材雄朔陲尙書旣還特以功赫當代兄弟  
子姪勲賢閒出自天寶距於開元乘朱輪而拖珪組者數百人  
迫於今茲繁衍彌熾綰軍州而握兵要者相望國都有後之慶  
固殊異於他族者矣真卿蚤歲與公兄子謙爲田蘇之游敦伯  
仲之契晚從大夫之後每接嘗寮之歡故公之世家竊備聞見  
敢述遺烈將無媿辭銘曰魯史褒者臧孫有之陳魚則諫納鼎  
以規歿貴言立時稱聖爲人昭墳典智叶著龜世濟忠肅光先  
羽儀以至夫公英明雄毅鶚視騰彩龍驤作氣鋒淬霜稜妙窮  
金匱謀猷泉寫翰墨風駛儒勇是兼勲庸以位介馳戎馬猛奮  
虓虎絕漠援孤連兵戰苦萬虜鳴鏑紛紛如雨一身抗詞諤諤



連挂精貫雲日氣雄鉦鼓狄人義激僕固誠全渺漫窮裔隨降  
幾千野靜沙雪風恬塞烟我騎如雲我旗連天牧無南向凱有  
北旋天子休之命侯開國謂福而壽康衢騁德奚命之遭幽局  
是卽十城玉折萬里鵬息陣雲蒼蒼日暮無色令人趨奉天眷  
孔明九原不作八座哀榮勇列徽範芳時懿名里成冠蓋族茂  
簪纓萬古千祀瞻言涕零

韋端符

官拾遺

李衛公故物記

三年冬端符於三原縣令座中揖其羣官有客曰李丞彥芳謂  
端符曰是衛公之冑也其家傳賜書與他服器十餘物者訖讌  
端符卽丞居爲客謁丞延入就次端符因跪請曰籍君僕射公  
之嗣固願見僕射公之烈之多其事辭雖史記或闕畧具天下



耳舌矣聞君世傳文帝詔與公服物者願得一觀丞慘然曰諾  
卽其家傴僂躍步奉賜書一函他物一器出發視有玉帶一首  
末爲玉十有三方者七挫兩隅者六每綴環焉爲附而固者以  
金丞曰傳云環者列佩用也玉之粹者若含飴然澤者若渙釋  
然公擒蕭銑時高祖所賜于闐獻三帶其一也素錦袍一其襟  
袂促小裁制絕巧密光爛爛如波旁出紫文綾襖一促製小袖  
如袍其爲文林樹於上其下有馳馬射者又雜爲狻猊虎豹橐  
駝者靴袴一往來爲鉤屬鏤劍文疑非華人所爲也自始傳至  
於今莫能名其物象笏一差狹不類今笏者佩筆一奇木爲管  
韜刻飾以金別爲金環以限難其閒韜者火鏡二大觶一小觶  
一竿囊二椰盃二蓋嘗佩於帶環玉者十三物亡其五有存者  
八大帝爲兒時與公子某年上下文帝命居宮中侍吾兒戲卽



賜以皇子服物黃綾袍緋綾袍皆爲龍鸞文素錦襖絳五采爲  
花若鳥者素錦半袖小笏皆緻巧功良今工之爲不能也文帝  
賜書二十通多言征討事厚勞苦信必威賞而已其兵事節度  
皆付公吾不從中制也暨公疾親詔者數四其一曰有晝夜視  
公病大老嫗令一人來吾欲熟知起居狀丞曰權文公視此詔  
嘗泣曰君臣之際乃如是耶端符旣畢觀中若有物擊惻其心  
者於玉帶見遠方致物而上不專有以賜有功也於文錦眾物  
見其時之工志攻不志靡也於賜公子以皇子衣服見視臣如  
友而猶兒也於詔征討見擇將材付將職也上尙不中制其事  
旁他可動哉於問公疾見上憫公如家人之視子姪也公之勞  
烈如是其大固有以感之獨推期運吾不信也丞曰子觀吾故  
物異他人之觀一似動色隱心者於霜露變時每閱省是物人



雅謂子工文辭幸爲記吾得觀以慰吾慕思也故日記衛公故

物

宋

扈

蒙

字日用幽州安次人官至工部尙書

新修唐高祖廟碑記

昔者洪水懷山下民方割墾之者禹也有夏多罪天命殛之順之者湯也紂爲不道毒痛四海伐之者武也隋失其馭塗炭六合代之者唐也然則干戈揖讓步驟不同至於應天順人爲民除暴其義一也唐之高祖曰神堯大聖大光孝皇帝姓李氏諱淵實天之英實地之靈體曦舒之至明稟融結之元精應符命而出順時運而生體貌多奇乃軒皇之瑞表寬仁大度卽漢祖之英風故舉義參墟堯起唐侯之比也陳師渭曲武誓商郊之類也尙或建義甯之號以表至公尊太上之稱以存大義然後



受九錫之備物繼三王之盛躅開基御極莫之與京若夫氛霧翳天晞之者杲日黔黎塗地拯之者聖人隋自大業末年羣盜蜂起大則跨州連郡竊帝圖王小則斬木揭竿攻城剽邑茫茫九土盡爲麋鹿之場擾擾羣生俱充蛇豕之餌亂離瘼矣謂之何哉帝時以英武之姿逢板蕩之世思欲救兆民之卒瘡拯六合之橫流濡足不辭奮衣而起加以寬厚容物則賢者爲之伐謀明恕愛人則勇者爲之決戰豪傑因之而景附億兆由之而欣戴故得活烝黎於焚燎易愁怨爲謳謠允答羣心終陟元后自肇有書契綿歷載祀撥亂濟時之主創業闢統之君如帝之比幾何人哉我應天廣運聖文神武明道至德仁孝皇帝名輝帝錄道綵王猷順元讖以天飛聳鴻基而嶽峙油雲在上羣生欽下濟之恩瑞日升中六合仰無私之照窮夏禹奠山之蹟盡



入四封罄周官經野之疆咸輸九貢頌聲斯作瑞牒爭陳日月  
爲之貞明河洛以之開啟然猶若稽邃古緬慕前芳訪墜典於  
石渠感受釐於宣室以帝昔膺土運奄有瑤圖泊谷變以陵遷  
遽光沉而薰歇矧自唐祚將季秦甸挺拔一抔曾盜於漢陵三  
月幾焚於驪岫我皇帝思延歷代澤漏重泉惜魏帝之銅臺空  
存舊址嗟茂陵之玉盃已出人閒乃命授以規模修其圯墉仍  
頌寵詔就建靈祠因獻陵之下宮據畢原之故地鳩工歲事不  
日而成觀其正殿中蹲景福靈光之比也迴廊對聳未央建章  
之類也其像塑也飾之以金碧丹青其服御也賁之以藻火粉  
米良工盡妙能事咸臻及大匠之告成命詞臣以紀事微臣寅  
奉天旨乃再拜稽首而言曰昔唐高祖鑿乾構象載育含靈括  
地開階重垂大統故能坐使一十九葉克紹於鴻圖三百餘年



善守其宗廟彼乃得之於前也今我宋后儀天立極稽古臨人  
蒼璧黃琮屢謹園邱之祀金泥玉檢將行岱嶽之封皇業聿興  
人寰受賜此乃得之於後也則知前聖後聖不謀而同以古擬  
今相去何遠詩曰維其有之是以似之又曰高山仰止景行行  
止其是之謂與宜乎德音是降祀典惟豐仍植豐碑以示來世  
敢尊睿旨虔抒斯銘曰唐昔受命奄有神器高祖奮庸肇基文  
陛重熙累洽綿三百祀宋今應運澤流厚地我后握圖文經武  
緯垂裕儲休卜三十世伊二聖兮相望諒于湯兮有光念高山  
之蕪沒嗟舜野之荒涼乃構原廟隆其棟梁乃潔明祀備以蕭  
鄉睿睠如是靈祇允藏敢載言而紀績期地久以天長開寶六  
年歲次癸酉七月壬子朔二十日壬申朝請大夫行尙書左司  
員外郎知制誥權判昭文館充史館修撰判館事柱國賜紫金



魚袋臣扈蒙撰

元同

穀

咸陽尹

李君義行記

富居五福之一人之性情所不學而俱欲者也處得其道則爲德義爲阜厚爲完美否則爲吝爲驕爲貪得爲怨府爲禍階是以君子貌不義之富而尙施濟然世固有傾萬金之資以食客分千金之產以業人者苟不揆諸理以適其宜非大姦卽大俠是又與於不義之甚也蓋財者生於百物本於天地不可妄求而必得生之有道則積有餘用之以禮則利於物而所及者溥故易繫云何以聚人曰財禮謂積而能散惟夫不侈用不妄交不孜孜以求譽不規規以取贏惠人不期其報見義勇於必爲斯之謂能施余素聞三原之龍橋鎮李君恭甫有施與名今年



春鎮人嚴生遵古持張好古所爲狀來言曰某受李君厚德欲求大夫士詩歌以發揮其義前中奉大夫甘肅行省大參晚節王公旣爲之序尙慮無以示永久得請於邑大夫監縣尹阿里沙尹李君漢卿簿謝君惟甯尉杜君彥常司曹朱君宏道將鑲石以紀其行幸先生文以記之余再四辭不容已遂按其狀君名子敬恭甫字也世雲陽人其考贈奉元路治中府君始徙家於鎮以市藥爲業至君性質謹孝友閑於治生益致富厚於紛華宴遊之事無所好賑窮周乏則汲汲如不及宗族鄉黨因其資而葬者三十喪婚者八十餘姓買驅而爲良者幾戶凡取其子錢或不能償輒焚毀其券前後總爲錢六萬若干緡關中頃經荒札有田業者率賤售救死維時君所買田凡數頃厥後例聽倍其直以贖君惟取初價卽歸其主族人田售不能贖者畀



尚北人淳質以小字行安肅州安肅縣人曾大父諱廣資善良有陰德爲鄉里所敬晚歲遇異人教攝生術年九十三乃終妣劉氏大父諱佺任俠尙氣有朱家郭解之風妣田氏父諱增志氣豪邁有遠畧不幸早逝妣孫氏三世皆潛德不耀公生九歲爲國朝所得隸乞武郡王帳下王見其聰敏令給事左右朝夕未嘗離稍長精通譯語便習騎射每遇軍前遣使詣金詣遼輒以公與行往返數次才能見稱忻州王屬城也戊子歲升爲九原府主帥闕王命公往佩以金符九原自兵革後戶口逃散農業廢弛公下車撫慰安集簡其徭賦無所侵擾民得蘇息又龐道多山有流沙柳芟閭家胡桃臺山西山諸寨多爲武恆山餘黨所據時出侵擾取糧餉於旁近之民民畏其暴莫敢抗拒公之間官蒙古不花以民與賊爲黨欲悉殺之公曰吾兵力寡吾



不能與民爲保障百姓與飲食以紓目前焚劫之禍耳非其願也百方營救竟得全活賊嘗有乘隙入境者公潛兵設伏殪之因遂傾其巢穴諸寨悉下自是豺狼之場化爲樂土庚寅歲帥軍南伐畧地潼陝間拔完城破堅壁甚眾辛卯歲夏宣授行軍千戶佩金符乙未歲從皇太子南伐至襄陽宋兵四十萬逆戰漢水上公以選鋒數百直前擣之宋兵大潰僵尸蔽野丙申歲從都元帥塔海征蜀川下興元宋將王遂以重兵守劍閣我軍不得進公募敢死士得十有二人由劍閣榜梯磴攀板沿崖而上夜闖宋兵大擾我軍乘之遂入蜀川諸城悉下及師還諸城復爲宋守明年再舉取夔府道直抵大江宋兵十三萬軍於南崖公麾諸軍以次第進躬與九人乘輕舸先登卽橫馳陣中出入數四宋兵水陸不能相救殺傷不可勝計自是宋人服公威



名望風震懾庚子歲夏五月朝太宗皇帝行宮畱七十餘日眷顧優渥負出倫輩嘗從容燕語及平生戰陣事命公解衣數其瘡癥凡二十一處因指示左右歎息久之進拜宣德西京太原平陽延安五路萬戶易佩金虎符隸兵二萬仍賜尙廐名馬六金錦三良弓四細鎧胄三副夫人劉氏亦拜雙錦之賜上又持公先所佩金符謂公曰汝有長男可使佩公奏曰臣子無功不敢當賜部曲有周獻臣者忠於爲國從臣有年矣願以賜之上多公有讓卽從其請自丙申歲分河東爲皇兄二大王分地官吏隨地所屬公以壬寅歲朝王於西域感匣之帳殿畱數月王甚喜及還賜名馬十乘錦衣一襲鎧胄二良弓百回紇水手一十人回紇綿匠一戶造作諸色軍器工匠一十六戶甲辰歲朝定宗皇帝於宿免都之行宮受命發五路未起之兵復征西蜀



取重慶等處未下城壁解佩刀賜公曰部曲有悍戾不用命者  
以此刀從事公以乙巳歲秋至西蜀所向克捷諸城皆定丁未  
歲復朝帝於宿免都之行宮眷遇甚厚賜銀萬錠奏偏裨將校  
從臣効力者多臣不應獨受厚賞願以天恩均被將校上曰卿  
可具姓名以聞於是千戶完顏孛住趙林楊粲李慥閻鎮楊士  
衍耿大用蒙古陳才吳澤忻州刺史劉天祿等十人皆賜金符  
胡林馮榮劉鎮海何義李興等五人皆賜銀符仍有旨命公出  
軍卽以長男山哥攝府事冥安梁英攝關中萬戶府事戊申歲  
秋奉詔還治太原公下車百姓困弊上請於王府下燕京行臺  
罷遠輸稅糧蠲減本路鹽課又自出廩粟數千石羊數千口銀  
六十錠以裨助官府用度之闕百姓賴之以蘇息己酉歲復朝  
王府王嘉公勤恤百姓治効昭著特命升萬戶府爲河東北路



行省所有軍民人匠稅課鹽鐵山河泊金銀丹粉審治皆隸本  
路得以便宜從事由是河東之民蕃息阜安異於他路公莅事  
凡三年壬子歲春三月五日以疾薨享年四十有九公儀表英  
毅膽智過人撫士卒有恩號令嚴明賞罰信必士卒樂爲出死  
力以効用故常能以寡勝衆而未嘗敗北讀書雖不甚多而喜  
與名士大夫遊如元遺山李敬齋輩出入門下皆所尊禮公務  
稍暇卽從之講論古今成敗治亂之理每至古人忠言讜論守  
義盡節與夫仁民愛物之事輒慨然嚮慕蓋有志乎其閒也此  
其識度高明過人遠矣夫人馮氏早卒再娶夫人劉氏建威齊  
王豫之遠孫生長華族恭順克家公周恤宗黨顧遇賓客夫人  
內助之力爲多又娶夫人張氏劉氏楊氏仝氏王氏楊氏趙氏  
子男十二人長天益小字山哥嘗佩金符宣權五路萬戶仍兼



太原路軍民都總管五路萬戶早卒次慈善亦早卒次札刺不  
花宜授鎮國上將軍鎮蠻都元帥宣慰使次天舉小字長安宣  
授昭武大將軍大都路總管次天輔前行千戶次天佑前陝  
西奧魯萬戶次天澤宜授大中大夫夔路總管次天麟宜授承  
信校尉管軍中千戶次天翼未仕次天挺宜授榮祿大夫汴梁  
行省平章政事次買住蚤卒女七人長適太原路總管石抹壽  
僧次適太原路行軍千戶周允中次適宣德路先鋒使夾谷拔  
突次適西京路諸軍同知蒙古壽童次適河中船橋隋路軍馬  
總管萬戶張萬戶奴次適太傅舍人耶律國正次適管軍總管  
阿禿孫三十八人以至元九年冬十一月甲申奉公之柩葬三  
原縣修真鄉長孫里濁峪西原之新阡大德十一年冬平章天  
挺拜中書左丞詔特贈公安民靖難功臣太保儀同三司冀國



公謚忠定大都路總管天舉乃持四川行院參議陳遼所撰行狀詣予以表墓之文爲請予以老病謝不敏天舉百拜致懇辭不獲已謹按行狀次第其事系以銘辭銘曰聖皇應運開昌辰四海引領攀龍鱗郝公世畧方幼穉英槩故已超常倫賢王帳殿高功勛一見顧遇如家人鵠雛破殼視霄漢天衢得路誰能馴雕鞍寶馬帶刀劍出入扈從無晨昏丁年提兵下荆楚戎律昭明嚴部伍平居撫士如父兄臨陳先登劇貔虎蜀山巉巖高插天捫參歷井古所傳一夫當關但坐嘯萬夫趨起那得前公畫奇策默不語鬼不得聞神莫覩長驅度險莫畱難如越短垣三尺土振旅來歸朝帝宮天顏悅喜回春融寶刀解賜紫光劍廐馬牽出天池龍曳紫紵朱霑阜隸重侯纍將及兒童祿位崇高君所賜子孫昌盛天所鍾陰功顯報方綿衍郝氏流慶傳無



窮

蘇天爵

江浙行省

張府君墓碑

奉元路之北九十里龍橋鎮者張氏家焉其地本屬耀州之三原縣職方氏以三原邑小不足以域民龍橋市井繁衍故遷縣治居焉君諱德明字彥明賦性淳質爲人廉靖忠厚少學詩書言動悉遵軌度篤於養親未嘗暫離左右或勸之仕則曰富貴非不欲也若舍吾親遠遊甘旨將誰致乎初張氏在金以醫術爲業至君考則曰醫人命所係蓋重事也吾以中人之資豈可易爲之哉當國朝戡定之初原野方闢加以雍土肥沃乃帥家人治農務歲連大穰家用饒裕遂大振施於人久之以孝義名一方蕭徵君所以表其墓也及君代理家政尤輕財好義曰此



吾親宿昔之志吾朝夕恆懼不克繼之有張澤者屢因婚嫁假貸於君積負甚夥君憐其貧一不責償取券焚之邑人李和雲陽李仁皆爲隸於人其家欲得錢縱之爲民間君尙義輒往請焉君以私錢數千緡畀之仍爲經紀其家是則書於同公埋銘者特一二事其他不及書者尙多有之推君之心蓋本乎惻隱濟之以惠利非欲見稱於人亦非覲人之見德也嘗以海宇承平年穀豐足若鄉校不修則無以興治化師道不崇則無由識禮義乃倡縣侯買地建夫子廟及學舍門廡而締構像設之費出於君之所施者居十之五遠近觀感爭遣子弟就學讀書習禮以變其俗君教子孫極嚴必擇賢師良友與之遊處使知古人爲己之學故修身莅政肅然有法蓋君之治家勤以中節儉而合禮祭祀盡孝燕享必豐誠以接人敬以持己鄉邦無賢愚



悉推爲君子長者中朝名儒宋公渤鄧公文原作爲文章以頌  
其美君春秋旣高以子貴封奉議大夫鉛山知州驍騎尉涇陽  
縣子享年七十有九以至治二年二月二十七日終於所居正  
寢配李氏先十二年卒贈涇陽縣君柔順恭恪克修內事是歲  
五月十有七日合縣君之喪葬於縣之常平鄉悌友村北君祖  
諱順考諱貴祖妣馮氏妣孟氏楊氏白氏君白氏出也子男世  
英同知鐵州軍民事世昌敦武校尉麻路新附軍上千戶  
佩金符累贈中順大夫兵部侍郎上騎都尉清河郡伯世傑承  
務郎同知松潘容疊威茂等處軍民安撫事佩金虎符終奉議  
大夫同知河州路總管府事世榮承務郎僉海北廣東道肅政  
廉訪司事終繕工司丞孫男曰信曰儻世英子也信中正院管  
民提領曰儼曰儼世昌子也儼由奉政大夫嶺北湖南道肅政



廉訪副使遷江淞行中書省左右司郎中曰佑曰仲曰仁世傑  
子也曰世榮子習進士業貢於鄉信之子履陝西行臺掾儼  
之子晉儼之子恆升曰王諒朱安仁女之夫也曰段珪李溫李  
居仁黎思恭楊敏王炳段永貞宋德新孫女之夫也嗚呼古之  
君子施而不求其報三原張氏自孝義君樂分施而恥積藏至  
奉議君克紹先志惠及鄉邑子孫昆季列官風紀遂爲縉紳聞  
族然則感應之理益可徵乎銘曰關輔之右風土高厚惟人之  
生克孝而友有美張氏世以義聞施與其親惠及鄉鄰釐身於  
家康甯豈弟施於子孫益大以侈總戎邊閫執法憲臺輝光日  
新福祿鼎來世有鄙夫多藏厚積遺及後人鮮有弗失積而能  
散其心孔仁己弗求報天福善人鄉有碩儒埋銘燧燧揭文豐  
碑永示來葉至正十一年春三月



吳元喆

前進士

清河伯張公碑銘

謹按張氏世居耀之三原曾祖順有隱德祖貴當金承安之末  
能脫其親於離亂中以致其養孝義之節鄉黨至今稱焉考德  
明以幼子貴贈奉議大夫信州路鉛山知州驍騎尉涇陽縣子  
公諱世昌字周卿幼事祖父左右奉養無幾微之失及長恂恂  
禮讓益恢廊有容望而知爲君子長者也昆弟四人有出仕者  
輒資其不給使守官箴季弟世榮爲海北廣東廉訪司僉事廣  
東去關陝萬里風土與中州異宜奉議公以爲憂公曰毋害也  
裹糧踰嶺徼往視之復命亡虞奉議公乃安而公遂無出仕意  
薦辟交至皆辭未幾授敦武校尉禮店文州蒙古漢軍奧魯軍  
民千戶大臣復以聞制授麻路新附軍上千戶亦辭侍御



使河南趙公憲微遊關中公見而異之曰國器也俾子弟締交焉既而知名當世人服其識家用有餘推以周其親舊之急還其邑人之賈而不能歸者三人涇白渠近在縣境行者病涉公慨然捐資鳩工伐石爲梁人甚便之鄉鄰弗輯官有不能諭者聞公片言輒相與解去其爲人所敬服如此初微由憲史起家歷官御史臺照磨迎公就養京師及拜江南行臺監察御史逾歲棄官歸省既而擢雲南廉訪司僉事以公年老盡養公曰君命也勿以我老爲意微迺受命公年旣八十一日有微疾儼從容請曰盍召微乎公曰勿亟微其歸矣數日果歸公欣然爲起飲食言笑無異平日於是與鄉老四方賓客日舉酒爲樂者數日乃終娶楊氏以淑行聞封宜人加封長安縣君復加封清河郡君先公二十二年卒至是合葬焉子男二長曰儼以任恤稱



仲儻也終喪之月朝廷起爲四川廉訪僉事今由湖南廉訪副使調江淞行中書省左右司郎中所至著能聲云銘曰洵美張氏世有令德泊於清河衍其流液友于是敦孝思維則施政於家表儀於邑侃侃侍御昔在家食公曰國士顯有明識世競刀錐夜不遑息公推其餘惟義所適盤錯糾紛盈庭莫析質成於公聞者潛易凡公之爲胡不於國公實有子邦之司直紆其紫綬來侍朝夕公壽豈多亦旣八袞生備福祉沒加顯錫天報善人孰謂叵測悌友之原有崇其殖何千百年尙徵斯石至正十一年三月

董立

字玉峯  
侍御史

重修文廟記

至正戊申歲夏四月三原縣重修文廟成教諭王懷中暨儒士



張在等賈進士程恕所具事狀及禮贄來致御史康君尙文之語請於余曰是邑徙治龍橋鎮六十餘年廟學歷歲與縣同久敝於風雨烏鼠殿宇廊廡傍穿上漏聖賢肖像淋漓漫漶無以設禮容聳民瞻適資善大夫河南行省左丞新安陳公思道承平章鄧國張公檄保障是邑莅政三年職修事舉時和歲豐民安物阜境內之神有益於民者往往修其祠宇以時舉祀睹廟學之敝慨然欲葺治之首發己廩繼以學租召匠匠計工攄材制用務趨於簡儉一本於順民於是自世籍之儒與夫在野在邑之農工商賈或效廢屋之材或輸壞器之鐵或織葦爲箔或焠石爲灰或助之力役或饋之饗飧以至陶人梓人巧者繪者板築者各推其有以給其用售其巧以獻其功易腐敗爲鮮華華傾敝爲完整未數月而遂落成而又繚以重垣峻其門闕廟貌



之嚴煥然改觀講學行禮漸復舊規公之化愚斯邑也如是不  
可無述以爲之記噫元德廣被際天所覆皆爲郡邑郡邑所治  
皆有廟學春秋釋奠旦望祝釐具有儀制興舉學校作養人材  
屢形綸綍修理廟學廩膳師生田有租入典章法度固未嘗亡  
也頃由兵興政亂守令失職所在廟學失於興葺其破漏頽圯  
者或至毀撤其材木瓴甓以供他用其幸而克全者或據聖殿  
以貯軍儲或依賢廡以繕甲兵俎豆揖讓之容不復睹絃誦講  
習之聲不復聞孝悌忠信禮義廉恥之道幾至於泯沒其爲弊  
也可勝嘆哉方此之際守禦之臣乃能奮然以修復廟學爲己  
任其體承上意崇儒重道以化訓斯民者可謂知所當務而不  
負張鄧公之委遇也邑之士民復能嚮風慕義競勸樂施以相  
成其美亦可謂易與爲善安於公之德政矣是皆可紀故摭其



概而書之且俾聞其風者知所慕效焉相其事者通議大夫湖廣參政員達奉政大夫樞密院判馬宗周承直郎永昌路總管龍一飛承務郎奉元路同知劉雲從忠顯校尉延安路同知木成督工前縣尹張繼祖縣尹趙志嚴供給岐陽山長吳允明按明

舊志是冬洪武改元諸公猶急於聖廟如此

明高宗本

### 西園草亭記

西園草亭者王翁仲智行樂之所也翁以淳樸之資沉毅之行少事躬耕蔑意仕進乃卽其邑城之西三里許闢地數十弓溝塍果蔬雜遰花卉而又羅之篠樹以固籬障勤之輶轡以資灌溉積之歲月或芄然露形嫣然逞姿油然沃色又或苾然吐馨鏗然蕩音無不可觀可禪可挹可芼而可食者也翁乃結亭其



閒上覆以草四周闌檻中揩淨几閣古圖書每時雨開霽天日  
爽朗曳短裙冠危冠流目引步逍遙相羊盤礴終日亦或命童  
稚持酒殽拉一二知己縱清賞人望之皆以爲神仙中人好事  
者因以西園草亭爲之扁復擬東園公故事以西園爲翁稱初  
翁之未老也翁之子今都察院副都御史公在邑庠翁拳拳於  
子之教未嘗不以勤苦爲期逸豫爲戒都御史時亦讀書草亭  
誓必成翁志屢遷今官每以定省疎曠爲恨而翁之拳拳教子  
亦未嘗或怠於厥初近以都御史公屢乞恩推封大理評事髮  
且種種矣兒齒台背康強無恙西園草亭所以優游桑榆者愚  
竊慕焉而未之能造也嘗聞漢有谷口鄭子真隱君子也耕於  
巖石之下名震京師昔人謂其足以激貪厲俗翁之遯西園忘  
形邱壑視巖谷之耕殆相類至其受推恩之封玉音褒嘉則視



名震京師亦不爲少也子真遭世叔季竟以隱終翁生際明盛  
之世衣被禮樂之華始爲慕隱終受恩封雖云不仕亦猶仕也  
足以激貪厲俗又足以勸學興孝若翁者世豈多得哉是以忘  
其膚陋泚筆而爲之記

李東陽

字■號西涯  
大學士謚文正

端毅王公神道碑銘

公諱恕字宗貫陝西三原人正統戊辰舉進士爲翰林庶吉士  
授大理寺左評事景泰閒遷左寺副條刑罰不中六事上之擢  
知揚州府屢辨疑獄歲饑發廩不俟報且給醫藥多所全活作  
資政書院教羣子弟科不乏人天順閒遷江西右布政使廣賊  
寇贛州帥兵剿平之遷河南左布政使成化閒擢都察院右副  
都御史撫治南陽諸府南陽豪爭礦殺人公獲其魁餘悉解散



以內艱去會襄陽盜起詔公起復會兵搗其巢走之及劉千斤輩作亂公亦會王師勦平之大帥欲縱兵搜山公不可因下令曰擅殺者斬復榜示流民諭使復業乞終制不許尋奉勅巡撫河南遷左副都御史歲旱蝗上疏請崇儉去奢以回天意入朝言時政六事遷南京刑部左侍郎丁外艱服闋改刑部巡治漕河成言弭災數事未幾而蠲租之詔下矣改南京戶部再改左副都御史巡撫雲南進右都御史以地切交趾言禦彝方畧劾鎮守中官諸不法事沒其部下所得金寶輸之京師勲臣世帥亦爲斂戢所役官軍土民皆還部業使人至彝方無敢索賂勢家假驛傳搬私貨者皆自雇役於是聲震遠邇改南京都察院參贊畱務兼督巡江尋改南京兵部尙書考選官屬不受請託爲同事所忌命以兵部尙書兼左副都御史巡撫蘇松諸府會



江南地震乞歸不許言內外官收納過重請爲禁革光祿寺歲供白粳及庖人賤工請爲分別派買物料織造綵幣及貢獻禽鳥花木請爲省節又請免常州夏稅六萬餘石以羨米還之又以補諸府戶口鹽鈔六百萬貫又以水旱災請免秋糧數十萬草半之以官田賦重減耗米十餘萬發廩賑饑民令減價糶穀又周行賑貸以戶計者幾二百萬以口計者有加焉有中官以買書收藥爲名搜括遍江南千戶王臣者爲之助惡公累疏言之乃命械繫中官梟首於市而中官亦誣奏公及知府孫仁仁就逮公又力捄之得免又請罷內降官數人又以京師地震乞辭位不許尋復改南京兵部尙書仍參留務聞秦晉饑言便宜十事聞林俊張黻之謫乞還其官因請罷永昌寺役加太子少保言政令必信不宜數改語尤激旋落太子少保以尙書致



仕孝宗在東宮已聞公名既登首降勅召之改吏部尙書加太子太保階榮祿大夫臺諫劾巡撫及藩郡官奉旨黜革公以爲不得其職連疏乞休皆不許南臺薦公可入內閣上曰朕用蹇義王直王翱故事委恕吏部若有謀議亦無不聽乃已宏治初從耕籍田預九推禮視學命下公請釋奠用幣爵用三獻分獻官致拜詔止許分獻官行拜禮公又爭之乃於孔子前加幣用大牢改獻爲奠至日分奠鄒國亞聖公侍經筵偶議不合辭印乞休上曰君臣之間恩同父子各陳所見何嫌何疑可視事如故乃起就職屬有疾上命醫診視遣中官賜酒米諸物南京給事中周紘御史張昇奉命點軍爲畱司所奏出補外公論掾之未得命臺諫交奏以爲老臣言當聽紘昇乃得改南京別任徽王奏乞陞鈞州爲府晉王乞爲世子設典膳皆論止之知州劉



概與御史湯鼐言涉狂誕當道欲坐以死御史李興多杖罪人  
至死亦坐重辟公皆論抹乃從末減山西叛賊王良等旣伏誅  
有議除其黨千餘輩公以爲脅從宜免議始定又請老詔大風  
雨雪免朝又免午朝復以彗見自劾求退不許進階光祿大夫  
柱國封三代有旨令中官會選御醫公執不可壽王冠充副使  
都御史秦紘以總督兩廣軍務奏安遠侯柳景不法坐致仕去  
公極言紘當用乃起爲南京戶部尙書太醫院判劉文泰者奏  
公不當令人作傳議者以爲有所受公具自列乃下文泰獄降  
御醫公又乞休蓋自蘇松以來前後疏十餘上乃賜允命給驛  
還鄉有司月給米二石歲給夫役二人賜寶鏹三千貫居十有  
三年今天子登極詔賜牢醴遣行人存問於家復加米及夫隸  
數倍於昔且賜璽書有嘉猷入告語公復上疏言數事正德戊



辰四月二十日卒於正寢壽九十有三矣訃聞上震悼輟視朝  
一日贈特進光祿大夫左柱國太師賜諡曰端毅遣官諭祭者  
九令有司給棺槨治凡葬事公墓在西園尙書府君墓次公所  
自卜地也元配蓋氏繼室張氏皆累贈一品夫人文氏封一品  
夫人貳室張氏公有丈夫子六人曰承祚義官承祐南京前軍  
都督府經歷早卒承祿義官承祥順天府通判承禋亦爲義官  
承裕舉進士累官吏科都給事中孫十三人統綬基埜節簡潛  
璿璟輅輜輦輿綬節皆縣學生曾孫八人安民友賢安邦安世  
安國安遠鶴齡松齡女二人銘曰巖巖華嶽雄鎮秦封靈秀攸  
萃爲人中雄端居廟堂進退百辟高舉長步直言正色奮翼而  
起排雲厲空紛彼羽族瞠其下風羣疑糾紛中有定括南山可  
移三軍可奪用我則出舍我則還外若可撓其中浩然秉彝在



躬弗枯弗失其所餘者以還造物挂車守閭世豈無才持以大  
用匪違則乖滔滔江流中有底柱顙波狂瀾不見其處功名始  
終自古謂難我所自立其成則天國史有書鄉賢有祀公名不  
隳公墓在此

沈

周

字啟南號石田

西園八詠賦

粵惟苑囿園池之屬關中者鄙夫無一隅之及一日之觀矧聞  
之髣髴於今稽之掛漏於古聊準長安之西笑託公子之夢語  
嗟夫上林蕪矣甘泉莽矣御宿稂矣樂遊黍矣西郊之兔跼矣  
宜春之麋麇矣梨園燬而礫矣凝碧夷而土矣類皆前王遊畋  
歌舞之區鄙夫蔑有所取也取則不無郭令公之仁里邵故侯  
之青門李將軍之北郭王右轄之輞川俾人追惟於往致儼水



木之如存又不無代遠人非於懷慨然然而何地無勝何代無  
賢何賢無述何勝無傳時則有若耀之爲郡實古雍地平原撫  
而裔愆諸陵壘而足峙荆耀而玉韞地靈而霧萃巖薛突秀而  
近拱漆沮流潤而暗滙壯哉三原之佳甸洵矣三輔之遺治屏  
八垠曠蕩之風鬱大塊塊北之氣負陰向陽審形遵勢宜賢者  
之胥宇嘉勝者之收麗百堵仡千弓迺迺從相卜迺從窆厝迺  
從構架迺從樹藝孝以爲基忠以定位擴中類仁制外牟義方  
之象行圓之比智厚以積德高以抗志於是大司馬公拓爲西  
園以藏以修存誠而樂道觀物而翫化非文饒之錮愚非季倫  
之豢尤徒悅耳目而恣般遊者也有碑勒銘在墓中堂史氏大  
書燦爛厥章於考世德於發幽光靈蔡曩屬而薦力文霓昭晰  
而呈祥其側有堂兩廂翼成榜蘭擗蕙芡芸填蘅浩浩穰穰儲



書滿盈紛者百氏秩者羣經標牙刻玉籤軸熒熒其前有池湜  
湜且泚不樂不溢不淪不澁擅雪滌之專攻潔垢硯之遺滓日  
新日資舊染是去方沐之槃讐飲之洗有松於軒徠服其隅離  
立矯矯直不假扶結瑤爲根聳玉爲株冒雪而臚被霜而腴負  
大且固樛貞不渝歷載而壽無度效材而需不訾有柳苞矣柳  
門之側匪朝匪夕先公之迹馘飢櫛參紅總翠輯畧和嶠千丈  
之譽襲馮異大樹之烈公之理南都也其在默運疇昵疇測其  
在獨斷曷憑曷藉祁然而威行沛然而德化潤廣則何物不沾  
庇大則無物不借民仰如雲所謂用作霖雨而澤下者也曰州  
曰藩公所蒞止化覃澤加則民之衰孱寡弱猶培而廡猶溉而  
華轉富而易庶若出乎咄嗟民之佩荷激切將以械櫟榛楛比  
公所樹之柳甘棠綠竹比公所藝之花公尙以池凡庶執事爰



有汙墨沙之汰之蕩之激之公尙以記末學膚受瑣才小能舉  
錄而鎮探兼收而並登揆方圓而施用期將就而勸成方我句  
吳之墟澤流湯湯爲割屢年民告饑墊天子簡公來旬來宣民  
乃驩呼拜逆鄙夫亦獲瞻承光霽識公宏正而亮鎮簡約而靜  
淵以之柱石則明堂底定以之調元則庶徵罔愆其時也於公  
之園奚止二四之可賦來百祥之駢駢草靈芝苗木仁理連華  
峯熒熒醴泉涓涓或蒸之孝義或應之忠藎其氣在人酬酢於  
天尙爲公賦之以屬於篇

張

奎

邑教諭  
見邑志

創造文廟祭器記

今夫天天地地而人人者孔子之功也孔子之功如是則夫後  
世報德報功以王祀之宜矣我國家酌古準今制禮作樂而於



斯文尤盛凡天下郡縣皆立廟學樂舞有數祭器有品以王祀之禮極隆矣至我憲宗睿皇帝又加以天子之禮六佾增爲八佾籩豆增爲十二光前振後尤遠過前代百王萬萬矣但司政教者或忽之而不舉或舉之而未善求其既舉既善而又堅且久者予於馬公見之矣公名龍字文祥山東齊東宦族也鄉薦入成均登黃甲司諫垣以直道不偶於時謫岐山移三原公自下車來以斯文爲己任凡廟學殿堂廡號牌坊一一飭治而振舉之尤思祭器苦窳敗陋不足以稱明天子意慨然大懼而審圖之造堅好白錫籩豆各二百二十簠簋各五十九羹盃五十八大者三爵一百六十燭臺二十四花瓶二香爐尊壘龍勺各一盥洗三咸以木櫝廚於神庫立案學宮奎等恐久而磨滅或爲匪人所竊據謀諸縣丞邢彪勒諸堅珉俾後之司政教者知



有所考稽云

林洪博

邑令見  
邑志

### 三原縣舊志序

三原舊志多脫畧錯亂不可觀石渠老先生巡撫南直隸時令  
常州儒士朱昱重作考究纂輯而成南京國子祭酒思軒王公  
爲之校正復序之於前福建提學僉憲任公序之於後可謂良  
志矣柰何鏤板之時被人將僞作之文增入遂使觀者病焉近  
蒙西安太守西蜀馬公行移所屬重修志書乃於老先生處請  
原本校之去其僞作餘悉從舊稍增古文及近來數事非敢僭  
也姑志其實以俟有道君子筆削焉

王世貞

字元美號鳳洲  
太倉人

送溫一齋入領左司徒序



一齋公之自廷尉出督全浙師也天子實念其師人跳梁曩者  
小創取羈縻而已恐不能弭隱憂必藉威望大臣一填拊之而  
廷尉資已重乃晉公右司馬兼御史中丞以行公乘車至浙凡  
二載浙大治於是復召公爲右司徒僅旬日復移左旣得代戒  
行侍御固安傳君以巡按京兆李君以治鹺於公有共事之雅  
移書世貞俾效一言以重行李世貞不及事公而再辱公訊問  
若以爲可與語者公之西北履則余家壤也蓋得公治行最詳  
公之始至浙也其兵猶挾衆而驕衣食縣官金錢以十萬餘計  
倭警歲漸寬然每至當守汛加予人六鍰稍減亦三鍰公曰居  
有廩矣行有餉矣而此無名之溢予謂何罷弗予而第令以時  
給本額衆喜其時而忘其省也已而有議遂減兵者公曰吾不  
可居其名也居其名驟見之則疑且怨先爲易營榜曰忠義以



愧其舊而感發之時時校閱汰其老弱者抉其黠猾不用命者有缺不卽補補則選海戍之壯而虞於餒者食稍稍減而兵不悟其耗咸大服公乃益延浙父老問所疾苦爲之奏減上供織造蠲宿逋請改折罷一切小稅禁譏關者毋得與黔首爭利東南之困益蘇乃復爲之益築江海塘隄以捍陽侯之難其鹵浸不得闌入而侵我田禾又爲之立義塚絕火葬以厚死者又爲之禁溺女禁陸博游手又爲之闡歌聖諭解孝經圖八行頒之學宮里社毋論學士大夫卽市兒田叟咸彬彬嚮禮讓矣蓋余之所聞而二君之所述類如此公今入佐領司徒司徒天下賦數也浙東西之民財力已盡賴公而蘇之然僅如醫者之治疾治其標而已疾雖去所以爲長生久視深根固蒂之道未易究也浙西北而爲吾吳吳帝畿也其風土如浙而賦加重其困更



加重自淮以往燕趙齊秦晉之民形盡鵠矣地且半甌脫矣天子哀憫元元數加賑賜蠲而恐一旦大農少府之泉穀不繼公之寮長宋公日夜探其本而求匪頒好用之式未盡亮也公之在青瑣時抵掌論天下事若指掌甯失柄臣之意而不顧今茲於事則益練矣其言益有味矣公三原人也三原之先臣有太師王端毅公者其爲庶僚不能如公之直言其撫澳與吾吳以威惠稱度亦不能踰勝公之治浙而數上書廷諍至光輔二主阜囊之所傳寫海內至今凜凜有生色焉公與宋公得無意乎哉二君子以世貞不腆之辭觴公公必返觴而曰不穀之獲免戾於浙也實二君子成之吾安敢掩二君子而自爲名且二君子在浙猶不穀在也二君子必復薦觴而曰公幸毋忘浙其在朝猶在浙也姑以王生爲筌蹄



葉向高

字進卿號臺山  
福清人諡文忠

恭毅溫公神道碑

御史大夫三原溫公以萬厯丁未年閏六月初三日卒於里第  
有司以聞上嗟悼輟朝自太子太保贈少保予祭九壇遣少卿  
某護葬事諸典隆渥公諱純字希文別號一齋後更亦齋父朝  
鳳母王公生有異表以穎悟見賞於督學李于鱗孫文恭二公  
文恭好講學得公喜曰吾衣鉢在茲矣以精一一貫及爲仁之  
旨授之年二十六舉於鄉第一人明年乙丑成進士除壽光令  
下車殲巨寇馬天保定四禮儀式輸賦之役親自甲乙里胥藏  
吏不得上下其手鄰邑奉絜令焉其勸耕織闢草萊決冤獄一  
切以經術飾治邑濱河故大司空朱公衡以河役費金錢多爲  
言者所劾行勘莫敢任者毅然請行課計精覈羣議遂息人以



此占公之幹力矣族祖良曾爲壽光令有遺愛至公復繼其業  
邑人稱爲二溫以治行高等徵入給事戶科歷吏左戶右擢兵  
科都給事積三年所條陳糾劾皆中窾係其大者如修時政通  
章奏議京營提督多見施行而又盡發巨璫陳洪諸不法狀雪  
故給事中沈鍊之冤直聲大震方內擢而以抗疏言俺答款市  
非宜與相國高文襄公左遂出參楚藩公故文襄公門下士也  
人服其不阿至楚首卻醵金以千計而峻拒藩王之亂宗行賄  
者文襄聞之亦悔出公公隨力乞歸比文襄去起參河南分部  
南陽南陽爲唐王封國官校與編氓雜處往往鬪鬪公中劑之  
著爲成約各無侵冒又脫長史袁福徵孝廉劉黃裳於難南陽  
縣令爲宗人齟齬公諭以大義立解計擒大盜段武散其黨境  
內晏然入爲太僕少卿改太常提督四彝館晉大理左少卿不



數月屢遷光祿卿錢穀供億內庭半爲奄豎侵牟公定日折常規俾四署遵行宿弊頓革屬今上大婚所節省不可勝計已轉卿太常復失江陵相國意移疾歸建學一草堂引名士講關閩之學江陵沒公起守舊官旋晉大理卿擢兵部右侍郎開府於浙浙宇內首藩兵民久疲公至著齊民要書以獎忠義褒廉孝紂淫祀爲第一義又爲改漕折減織造復陂池人情大悅團操軍聚居會城與居民嚙牙議者咸欲出之而畏其悍恐生變公呼而諭之咸唯唯聽命軍中老弱疾病有故則勿補遂合九營爲七而兵不知汰與諸臺使者約交際皆從省卽不得已拜賜則籍而藏之以俟報禮一夫一馬不輕煩郵傳其躬自節約以風勵下吏大率如此浙故有楊任二姓坐方遜之累公疏豁之召入爲戶部右侍郎轉左上閱定壽宮公守崇文門賜彩幣晉



右都御史總督倉場請停新增供應劾監督主事之不職者屬吏肅然亡何以內艱乘傳歸旣免喪日娛侍太翁膝下太翁好弈公每進食必設局趨侍翁欣然加餐邑城有峪河梁之以木令欲石之而窘於費公曰吾父志也傾橐中爲助旣成人名之曰溫公橋劉惇之變公先是已告執政謂開府非人急宜更置不且釀亂執政不能用其後公又畫坐困火攻二策以遺行閒卒破平之世莫之知也召起爲南京吏部尙書入爲工部尙書以終養歸隨丁外艱除服起左都御史掌都察院時四明沈公秉政每有事咨公公必悉心以告播酋煽亂廷議未決公力言宜勦遼左被圍東關堡且破得公所遺火器擊虜虜辟易所全活數萬疆吏欲以爲公功公遜謝乃止力請下考選罷鑛稅釋逮繫諸臣皆不報乃約諸大僚伏闕泣請上震怒問誰倡者公



對曰臣純也上亦霽威宣旨慰藉曰徐當簡發公等呼萬歲而退已又懇請早建元良每請必齋沐露禱庶幾感格未幾冊立禮成忽一日上偶違和詔所司悉舉時政所急如罷稅等事公與太宰李公司徒陳公謀卽日奉行仍頒示天下而司寇蕭公謂釋繫須再請乃上意中變矣中外惜之劉御史九經以日食陳言語侵執政九經秦人執政不能無少望而媒孽者遂謂公與次輔歸德公及太宰或同鄉或同譜夙相厚善而少宗伯江夏郭公爲公密交其於二三輔臣不無左右袒臺省姚于二君爲公所糾因反擊公人謂二君與沈公善於是形迹逾開不可復合矣非久又有妖書之事以動搖國本爲言執政請於上務窮所繇來旨下大索長安中遍及海內敢匿者族發覺者封萬戶侯人懔懔惴惴旦暮不自保公與歸德公每搏顙顙天願高廟



之神靈耳久之捕得奸人噉生光詞連周錦衣嘉慶太宰與嘉慶有連遂坐此去時郭公以楚藩事忤執政已出都矣錢給事某上言妖書出自郭且牽及歸德公附和者遂謂歸德匿郭爲密謀邏卒日夜環其第偵伺之禍且不測公獨明其不然又疏言楚宗無反狀爲楚藩地者欲出力而文致之耳其持論侃侃無所避忌多此類以二品再考加太子太保屢乞歸不允踰歲當內計執政使人語公此番計事凡舊嫌夙怨當一切破除又語少宰楊公各屬賢不肖皆聽其長以受成於明主不得有所侵奪公嘆曰此挾天子令諸侯耳歸德公亦請寬錢給事以兩釋猜嫌公終不聽於是黜給事輩數人而中旨特畱用公去志遂益決矣竟予致仕去抵家講學於精一一貫兩言諄諄切至嘗語門人謂孔一貫孟踐形正是精處一則不二若以人心爲



私心欲絕而求道心則二矣非精一之旨也其論良知稍宗姚江而歸於孟氏之親親長長內外知行合一不分論仁則以孟之自反契孔之忠恕簡易直截大絕世儒窠臼是以起家縣令歷九列忤三時宰百折不回人負公而公更茹納之人整公而公更曲護之要於平日所闡發非苟言之實允蹈之矣沒後禮官集廷臣議諸當易名者甲乙紛如乃於公獨無間言此亦足以見公矣公爲文酷慕史遷詩則摹擬少陵然自以爲緒餘也撰著甚多公得年六十九元配李能以孝敬繼齊佐公於約繼楊氏宋氏皆有婦德贈封皆一品夫人先妣太翁兆副室趙子男三子知官生日知舉人自知諸生女六孫男三樹瓊官生任太僕寺寺丞樹珍樹琴幼婚聘皆名族不具論銘曰維溫之先御史瞻洛晉顯六龍唐開彥博我公雲仍芳標繼作筮仕青齊



殫心求瘼瑣闥封章蹇蹇諤諤薦陟貳卿名藩秉鑰八座中臺  
勲名烜焯維彼附羶競希入幕倚託冰山墜驚雲閣如公皦然  
進退無忤畏此緇塵污我京洛不可卷懷一邱一壑學契虞廷  
教傳孔鐸直悟中局匪剽外郭世羨冥鴻公遽化鶴木壞山頽  
正氣磅礴華池之陰巋然石櫛黃壤青山司空荒度伉儷式諧  
斯邱可樂豐碑余銘慰公冥冥

尹伸

創建三原縣校士館碑記

關中人文之盛首稱西安所隸凡三十九學督學使者試西安  
士凡四巡而後竣巡行弭節之處必當十許州縣之中三原其  
一也秦之督學無專署署之大者必曰察院蓋巡方使者之所  
蒞止也督學至則架木疊席於堂下之兩廂聊集多士名曰廡



房其費不減百餘金試訖撤去無論一二年之內常委百金於  
壑初之下令追呼煩擾閭里是亦秕政之一節矣當事者誠知  
其然欲爲一勞永逸之計而獨難議枹非枹之難枹之費將數  
倍於所委未易辦也萬厯乙卯督學李公蒞事慨然念之爰檄  
列郡議如鄉闈之式而小損其工易架木爲肯構易疊席以覆  
瓦悉取缺廩充費於是條之巡撫李公巡按龍公俱報可檄下  
三原請以城中一察院葺之如前議知縣雷子繼其事復相度  
計之曰署僅如此構兩廂而空其中多士終不免風雨之虞若  
臨試而再爲之計浮費猶昔也且督學則需此矣巡方使者坐  
廳事而臨諸司務以虛豁爲觀何取幕幕者爲哉乃從署西得  
阡隍廣八丈延二十六丈急實之南北稍促益以民地二丈有  
奇復轉聞於巡撫李公巡按李公皆得所請於南作大門一儀



門棹楔一俱齊舊署北作廳事五間齊舊署之後堂東西作厰房八十間高三丈六尺爽塏光明暮可辨字而廳事之後復門其東通舊署之便室校閱寢息猶然栖其中焉是役也工作凡三月而成計房大小共一百四間初發官鏹二百八十金不足雷子復以百金佐之落成索記於余余曰微子之請亦安能靳一言哉夫試場之爲擾人矣當吾世而革之人知恤士逸民自尹子視學之日始而不知議始於李公斷始於諸臺也當事者卽知費之出於缺廩而又不知益之自雷子事雖小所便實多其以此識之於石前撫臺李公諱楠山西人按臺龍公諱遇奇江西人後撫臺李公諱起元按臺李公諱養志俱北直人督學李公諱櫟浙江人知縣雷起龍北直人

傳振商

汝南人  
巡按



重建學古書院記

予以茗戰役竣駐池陽憑弔王端毅康僖二公堂構相承爲一代名臣冠旣而詢之知公壯年力復元義士李子敬學古書院址後在告時與呂仲木先生日論學不倦早窺堂奧故發攄璘璘羨淵源有自輒神生其宇也洎己未夏以視師西夏還再駐池陽則邑弟子員愀然羅訴若毀其甯宇者然諮其故曰前書院以勑試士場借材撤矣不惟墟土繙閱所且令吾夫子并四大賢遺像在圭竇風雨中也可謂斯文奇厄予曰撤尸祝祖禰之室而褻諸縣別宇輕重安在矧瀆蒙俱鼻祖入室名彥哉審爾則予之按圻南也江陵廢恆陽書院流爲將閩洿天雄書院鞠爲茂草予皆興復之新勑書室百五十楹并邢之國士書院更葺新焉宜踵往事因檄陳二千石應元詳議二千石旣明且



敏行踵文翁風規星言審覈以前雅躅不可終莽宜從諸生志約二百緡予隨動緩八十餘金不給者二千石查別貯足之并聞大中丞瞻宇李公公雅意文教章縫彬彬向風日懿美也亟共成之於是委縣簿劉嘉登庀材董其事以六月望日經營舉工中構堂五楹顏曰傳心以便會業問難兩旁枋讀書室十八楹右隙地後復枋室十二楹以供誦習大門內復構門三楹規制始備復葺庭後敞陋正室五楹旁室七楹以及垣角曲折丹堊題署之事罔不悉舉至七月二十四日告竣不惟頓復舊觀而絃頌之室翼翼倍甲疇昔矣因檄二千石令有學博士董士子業其中有常程焉予低回廢興之故而信素王之宏也蓋尼山薪火寄於人心長夜由之以旦繼述者築宮呼朋日設皋比非聚訟也從講究中寄薰牆而世道人心賴以搏挽卽比之布



金和南尚恥甚爲褻誰忍摻戈揚秦坑之塵而圮其宇者卽偶  
有乘數之窮而滋其謬妄雖偃月之權終不能勝興復之人此  
其中固有乘造化而遊者廢固所以爲興羽翼者所以後先繼  
起也自李氏勗後其故可鑑矣因誌貞珉綴以辭曰池陽奧宇  
非元非史躅尊白鹿誦法孔子李氏遺蹤石渠興起談經講藝  
戶外物屣胡爲中衰毀宮沔址蒙俱委塵高賢盈泮書殘墨散  
藜滅螢死章縫掩袂悲訴共指爰復盛觀星言更庀踰月落成  
翼翼并峙士歡洛誦春回桃李廢也何故蠱爲鼎始尼山分潤  
所護爾爾傳心難燼尙鑑前軌

張縉彥

邑令見  
邑志

公理郵政記

夫聚櫟續食乘傳過征從古行之焦穫稱陝壯縣制撫都御史



巡方治鹺治茶諸御史衡文督學臺停驄駐節以及輓輸四鎮  
軍餉歲再三發輒蓋三秦之衝邑焉驛曰建忠馬二十五匹募  
十五家芻秣之其始經費二千有奇裁減至一千六百有奇當  
澄清之日承應尙難邇來羽書旁午募夫質妻子易田宅且鼠  
竄雉經焉余分符一載目擊心傷進募夫段起龍等垂涕控訴  
因念今日秦中何時也徵兵催餉何事也此二十五馬者非驊  
驪騄耳之駟碧玉汗血之駿也此一十五姓者畜牧孳息控馭  
無王良造父之術也烏能應使客輻輳軍書絡繹哉若使仍舊  
召募則涇高二路不必取道於華池矣然壅阻滯塞此必不得  
之數矣或復裁減之額并前告增之數庶便馳驟然成議難更  
此又不得之數矣或將本縣協濟宜祿停口兩驛之銀量行除  
扣然損彼益此紛紛告擾此三不得之數矣夫不病募夫無礙



里甲惟有公養一法乃爲條議以請於上官皆報可時丙子六月也余急檄購良馬得五十匹草豆計口而值羈帶阜棧櫪餼鞭策之屬及廄房廝役飼餵渴而禦風寒皆於數日而畢七月上旬改募官馬額設工食不敷所費請於憲府又下縣議此項固無所出借大餉則終虛懸耳於是捐俸及縣馬工食千金折而入於驛又查募夫之透支者諭而出之不動里下纖毫事已克全一月之間絃轍大更馬驟騰躍郵傳往來如初矣不佞親行督理非勘合火牌槩爲罷捐盡不佞之心不敢有遺慮不敢有遺力而已募夫十五家請勒之石以垂永久因述其梗槩若此若夫馬匹銀兩草豆之數詳載碑陰

馬御輦

字元御  
涇陽人

龍橋賦



台嘗訾齊州之局促不可處也翹首長褭假翼三危五城之巔  
驂雲霓吸海氣於壺嶠兮排閭闔攬八際之長空以騰騫逐驚  
電凌倒景以嘯傲兮御罡風舉若木於扶桑之淵乃左顧清冶  
之干剏闢此逶迤梁以天嶠兮類常山率然勢蚴蟉而蜿蜒杠  
之鈞石之倚不堪眉厥表兮錫嘉名以龍橋實吐納夫日月而  
歎欽乎雲烟方其輿梁未成臨河悵望百川灌沸霖霖滉瀟地  
非廣陵莘將之陣似馬峽類瞿塘濫瀕之大如象池陽湧胥侯  
怒潮焦穫來天吳噴蕩湮層臺兮波臣驚問水濱兮魚腹葬腰  
瓠者流嘆胥溺祝支祈使收湍佩罍之子懼汨沒祈馮夷令戢  
浪行子羈客赴螭伯儼不前長年三老股慄魂搖欲喪涉淺者  
冀狔騎星之流槎貫月窟走陸者希縹緲風之逸駟奔天上越  
山飛兔嶺表迅猱不克跨兩崖而絕渡也令人恟恟駭比夸



父逐日僵鄧林而棄杖於是御史大夫溫公慨於中者匪今斯  
今矣羌丹陛兮朝辭繫綠野兮暮開舟楫障百維狂瀾援溺潤  
九抒宏才爲社稷捍大患爲烝黎禦大災朱提捐厥筭白鏹庀  
厥材爰謀長吏鳩匠作再咨阿耨醵檀財乃召般倕剡劂運風  
斤乃檄王繭鉤繩相水隈育賁畢力扛鈞石離朱張盱洞九垓  
割地軸兮盤底柱摩天倪兮構崔嵬覆簣基兮襄陵奠支機礮  
兮驚濤迴堞嶺壑約巨浸於隘口肱義臂變化徂途以夷陔  
策五丁剗翠岩北向驅六甲擘丹嶂南回斷三山之鼇足擎四  
隅軋九淵之螭頭層臺宛如帶兮梁連蜷平如掌兮砌珉瑰  
爾其鹿原背環堯門對峙一水似鷺洲中分兩崖則雉堞夾起  
大壑豁訝怪石喂嶬茂先叩而魚鳴初平鞭而羊苒零陵之鷺  
乘風藍田之虎飲羽莫不翰載蹄輪赤瑛白玼作礪取鍛次鱗



排齒鎔以鉛鐵苞以楹礎遠眺今砵磷鬱律跼仗翼跂近睨今  
登降崩施墉崇櫛比脊承嵐氣互天標脣舁河光清地祗獻平  
激束馳道如砥軼後燕之五丈擬成都之萬里爰見遼矣百弓  
巍乎三門役百靈而鳩藝象三才以拱宸圓形模漢方阜枕濬  
曲空半壁直矗長雯修碣駕雌霓而飲澗曉闕浮蜃樓而麗旻  
代鷁舸兮宛虹易舳艫而輶輶奚羨夫築宣房塞瓠子者君臨  
河而斬茭官下隄而負薪況乎館陶金堤之決竹石隄防者三  
旬王延世雖爵關內侯賜千黃金再決再塞得無病國繫勞民  
揆彼於此何古可今迨乎砥定疎沼漲息智井空闔吼鯨淤瀨  
遊黽青蚪變虺而撥鱗靈狡髯鬣而露睛硤道齒齒兮堆雲盤  
渦活活兮鑑影五陵游俠躡玉螭兮踵隨三河年少凌金鰲兮  
背騁簫鼓喧闐絲竹嘈啣耳沸洞庭廣樂鈞天之界輪鞅轟厓



旂旂沛艾神悚列缺震霆霄漢之頂泝泝統者蟻聚淺汀薄沚  
以龜手代耕汲澼泉者魚貫城塢河湄以平挹當綆不覺時暮  
而日曛頓忘天高而地迴乃有元纁筐筐載輸載浮金錢赤側  
乘馬服牛九逵污萊爰茲稼穡四方輸輓遵我軌修旣舍筏兮  
尋岸罔潰轅兮摧輶市廛蛭附賈肆蜂稠窗臨水而逕窄戶循  
溪而巷挈腋招鄭隄白渠兮邇接沃壤頂揖甘泉谷口兮遙據  
上游依稀漢中子午谷彷彿清水甲庚溝廬比棟連幽雅推皇  
過澗波滌堤遶楚騷賦蘅杜洲有時梅風送淺燠有時梧露薦  
新秋有時扣舷歌夏聲有時擊缶嘏秦謳不幾惠施濠上之樂  
蘇公赤壁之遊乎至若辭客騷人恣賞耽翫觀川之步夷猶題  
柱之幘傲岸維駢駢之驂騑尋青青之河畔嘔淵雲兮瓊葩揆  
應劉兮藻翰青衫浣霞漪而岵舉彩筆耀文連以燦爛賦鶴汀



兮鳧渚詠牙檣兮錦纜溪邊潑墨石氣流清花下漱玉水光零  
亂腕伸曳寸管兮搖風芟笑墮九光之流電覺造舟鞭石皆可  
摘雄藻也心花背力直射蝨輪而晰馬練亦有方術雜技河上  
逍遙唐舉皮相季主龜焦都盧尋橦胡賈吞刀巫覡儼迴廊而  
絳繚長桑飲上池以招搖蓋聶彈劍蒯緱錯乎四術秦青繞梁  
瑛琯徹乎重霄炙轂談天鄒衍稷下之口逢占射覆曼倩扑  
舍人之尻宜僚之竿累丸佁僂之手承蜩磨鏡負局皤翁扶鳩  
杖於巖際放鳶鬪雞變童臂鷹鞬於江皋跛牂樓季橐駝僬僥  
鮮不海井鼃之觀溟渤角深冰夏蟲之智太華爭高乃有靚妝  
麗姬深閨豔妾朱顏如花皓齒似雪橫塘整鈿古渡弭節念蕩  
子之遠征憶河梁之久別北紫塞兮赤城南五溪兮百粵臨長  
堤兮一望慨柔腸之寸折陟危磴兮戍削想猿峽羊坂雁宕雞



足之罔通升峻坂兮紆曲懼度索繫牝地肺天塹之難越王孫  
何日歸韶華經歲歇倩秦箏兮銷閨怨聽隴篴兮舒腸結繫或  
春風駘蕩春水淥揚豪門連袂貴族飛觥西園集雅南浦尋芳  
草逗青兮畫舫荇鋪黛兮銀塘蘭亭修永和之禊河橋舉元凱  
之觴曉風殘月楊柳岸紉蘭佩蘅芙蓉裳桑落蒲萄泛醞醴躡  
熊胎豹佐餵餽大嚼之聲鞞如鞞如吸川之飲汝陽高陽複道  
行空際攜手上河梁躡一綳兮凌高阜折雙屐兮傲餘鯨及夫  
白帝徂秋金商成露澎湃江豚吹洶湧老蛟鬪憑橋觀漲高朋  
填路慕宗慤破浪乘風追枚叔奔濤翔鷺或潭澄而潦收亦菊  
芳而蘭秀雁陣碧排楓林紅逗詠秦風蒹葭章望伊人兮水一  
方賡印段蟋蟀句瞿良士兮歲云暮何事羅鄂州銀橋升月奚  
必孟參軍登高能賦人境移來昆明池秋風動石鯨鱗甲女牆



幻出滕王閣秋水映長天霞鷺無事舸艦迷津煩榜人之扣舷  
也緬茲長橋臥波覺陽鳥匿景乎危巉勁隼斂翮而側度沉乎  
年來潢池欲止戈黑山亦寢柝浪漸息江皋氛將靖沙漠聖天  
子恥爲驅石橋海之舉除道隕霜成梁水涸佳氣浮秦川榮光  
幕河洛鷄犬雒般仍穫中慈義比屋復綺錯城頭鐸韻遶睥睨  
而遙賡廊腰灘聲雜漁歌而閒作橋之中洵訏且樂橋之上望  
衡對閭橋之肆轂擊肩摩橋之民鼓腹盤礴白鶴歸華表不待  
天寒青龍見水中無煩日落吾姑翻少陵之雅句以贈此橋尙  
嫌未盡也庚思躋龍橋於龍門之樨樿比三原於三巴之疏鑿  
恭毅勲德厚且博岫嶺禹碑我重廓系以頌曰仰觀天厥梁星  
天津垂象彈弓形俯梯山厥梁石天根涸水輿梁成虞典六府  
弗石紀邵易經世分四比坤石少剛離星匹皇媧鍊五補天闕



溫公柱八承天碣化桷以磐功利涉重險兼山坎艮攝軫形穹  
窿澗之濱金湯墉壑惠吾民龍橋巖巖萬古存亂日龍德中正  
厥施普兮見龍在田爲霖雨兮我賦龍橋鼃鼃徙兮晏海澄江  
佐天子兮

國朝劉漢客

過鑒硯齋記

牧庵息影於幽之東阜縣遊鞍者一年耕桑鎌採思索黏黼無  
友欲推書撲筆未能也而遣蒼頭爲一封書遺故所善溫生溫  
生者恭毅季子與亨今之元晏約過其齋豸吾憂書達盜遮寒  
門不得出乃騎驢走分水嶺歷好時以達池陽時余畏塵著輕  
容過其里門庭蕭寂殊無輜輶擊鞞可訾省候久無人及門始  
識章甫立憲憲逆余入握手甫及剝苔而愁去箭飛泉涌來謹



矣別深款要勿勿從盤餐茗盃閒爭吐納至咏越說楚荒茸且  
薤之蔬甲頓飽酒數巡杯觥未溢卽撤去下榻於鑒硯之左个  
就倦也與亨有丈夫子琴卓犖瓌偉能讀父書侃侃自將不縱  
爲子弟華靡遨放事執弟子禮陪余眇衰越明日有儒一生自  
高陵年少能歌開罇俎於北軒低歌未逞晚移於齋得醫友小  
董來列襟聯袍爛漫同流歌始暢與亨畏痰不大酌余亦凝醒  
不敵諸少與亨以卷波鼓之一鼓遄飛再鼓醇酎竭三鼓繼以  
蘆酒蘆酒方啟視齋外寒氣熨臙目窈窕其尙曾未移晷而月  
妃嫫媿上天東羣篁僵立無幽不鏡與亨起踴躍曰天寒子夜  
得月甚難眾方罷嚼啜移步看梅冷豔疎枝月下浪浪欲墜云  
是西弄種騁驚書林翺翔藝閣凡窗壁閒片札綺語無不競覘  
之與亨又徐謂昔謝觀賦白首儼梁王苑庾亮樓余臥樓一段



受月更完真有羣山千里之勢可入觀之公子前導初及於寢  
門之外竹樹交加浸地似氍毹兩廊殘釭冪烟坐成疏島再進  
屨及於窳皇天高無雲院空如水月華綴牖輦交螺首之無遜  
形嗟嘆久之乃轉出廳事屏風鞞帟蔽我題柱絕無世家縛綵  
之習容容昂昂列以十二大手振德華咸圖我先公之功勳輝  
焯名篇爛然如王弼州汪新都李京山文西極其最鉅余醉不  
能讀與亨左執燭右執手卽刃迎縷解而誦之視鉤章棘句若  
鎗鏗啾唧之下街彈也聽祛夕醉又明日散步池上或禮舊石  
或倚松牆或看花或弈碁因訊前植白股松無有爲之悵然如  
失故人晚飲酒達四鼓話吳越楚荒茸過半又明日與亨蚤起  
拂屋塵簡笥中所藏董伯源趙松雪沈石田墨寶張於壁以解  
朝醒飯後示我醍醐海印樓集凡二冊予亦出雜著近詩就正



更相披閱質之累日而無窮又明日作寄江南友人書晚觀與  
亨千行功程自父兄大業以及閭閻拯濟諸細行如構室計料  
棟桷柱礎之無一虛設也又明日與亨喜余至成七言絕五七  
言近體凡四詩余報之以二章晚飲酒各述歷年近況又明日  
西灝來攜其族譜求序夜半得珍鼎篇軸讀之乃恭毅甲子榜  
年人製以壽年祖太翁者中楮邊錦其楮如凝漆大類紵字則  
純用歐陽率更法無一筆苟贈言則出自新都列三墳而仰止  
魚魚雅雅詞無過情齒尙編年古大臣布衣昆弟之風恍對一  
堂前輩一舉事而美備如此與亨操守不媿先公余媿先伯多  
矣汨浪浪下沾趾不釋又明日余行凡七日方今時多難盜寇  
相尋國殘邑壞暴骸中原人民不聊生族類離散流亡爲僕妾  
者盈滿海內人之爲鴛爲鷺爲蛇爲豕爲獍爲鴟未可知也宅



第之爲市爲野爲寺爲觀爲劫灰爲瓦礫未可知也而與亭池塘竹林無恙教子有法好道無已其故家遺俗流風善政猶有存者視行不備於當時葉不傳於後世者何如乎己丑日月陽止九經遊子感於衷而紀之

葉映樞

督學政諡忠節

### 重修學宮記

今之學校由古制也而今之所以教所以學者非古法矣三代之時以意行其法學記王制諸篇皆道之使學而蒸蒸相長於德義三代而降以法存其意鄉黨自好者乃束身俛首以從事而通儒大臣胥於是焉出由是士無賢愚罔不瞻眺泮宮翹首頓足以取世資而階榮寵故猶足以繫天下之人心而不墜是學校者化民成俗磨鈍厲世之本也然郡邑長吏往往忽之風



兩摧其宇茂草生其庭狐鼠窟其宅而不之省者十且八九焉  
非故忽之也以其無切於己而重惜勞費也稽周禮惟國學有  
司樂司成專主教事外而州閭鄉黨之間其長各屬民而讀法  
考其道德糾其過惡而勸之吏卽師也秦漢以後治民則郡守  
縣令教弟子則博士文學吏事其事師業其業若冰炭之不同  
氣方員之不同用其忽之也固宜三原之有文廟也始於元成  
宗之大德十年重修於明憲宗之成化十二年明倫堂則邑丞  
仰山卽洪福寺基改創之溫恭毅公從而葺治之又建尊經閣  
購名書以實之年月垂久剝蝕相仍殿廡堂舍頽圯朽敗百餘  
年來莫之舉也邑令葉君顧而慨然曰余民牧也邑之農桑於  
令待養邑之教化於令待成邑之祀事於令待享且文廟大祀  
也譽髦秀民也令弗之舉而謀其事貸其力於他人者謂民牧



何乃計值捐貲庀材鳩工由門而廡循廡而殿殿折而閣閣趨而堂堂徑下齋舍厚其基敞其宇深其池易其朽敗葺其頽落卑者崇之陋者廓之繚以重垣藝以卉木飾以丹雘不數月而工用成巍然煥然一似古未有而今勦之者嗚呼令真無忝於民牧矣吾 國家好學右文孜孜弗怠卽頻年用兵萬幾殷集而 經筵日講寒暑不輟故閩粵楚蜀以次削平滇黔清蕩年有晏如干羽兩階之化有由來也方且戢戈橐弓开辟雍修禮樂以宏文治而三原廟學之成適與時會詎非偃武修文之明兆歟且三原爲古左馮翊陝右重地俗淳雅而士勤學鉅公名卿代不乏人將來翊文運而黼黻太平者有不從此出乎邦之光也令之惠也余不敏奉 命勸學於秦者三歲今秩滿瀕還矣媿無以興起教化而猶及見盛事之告成也是亦余之幸也



故爲記

李

顥 字中孚號二曲盤屋人

慤叟李公傳

公諱宏樗字元文別號慤叟自高祖以來世以詩禮忠厚傳家皆不克顯公生而穎敏慈良自爲諸生時讀程純公一命之士畱心愛人利物語慨然有仁民濟世意顧數奇屢試不偶戊子歲試冠軍拔萃貢春官廷對授永州別駕時湖南甫定羽書旁午佐守調度軍國不匱民亦不大困當事以爲賢連委攝零陵新田甯遠三邑所至有聲經畧洪公尤器其才特疏請優擢尋移守桂陽永人士臥轅下不忍捨去桂陽地凋瘵居民零落於是痛裁弊規革冗費懇荒田緩催科嚴胥役侵漁慤慤懇懇以勞來安輯爲第一義然桂陽民當新復之後實不勝軍國輸而



當事者顧欲各濟乃事不暇恤旬日閒催檄雨下公百計寬解之不能得乃喟然嘆曰吾忍以民命易一官乎復懇款圖民不堪狀冀一惻憐竟不見察遂以催科政拙左遷桂人多方籲留之不得也去後置主名宦祠樹去思碑錄諸善政載州志焉公歸讀書課子蕭然自得嘗訓其二子彥瑁彥玠唯以立身行道不媿清白吏子孫爲諄諄富貴聲利恥出諸口也居鄉不喜外事獨厚於宗族鄉黨搏已裕人諸所媿睦任恤者備至卒之日一如去桂陽永州日民德而慕之不衰也公在日長子彥瑁已成進士由中書守肇慶績著循良次子彥玠薦丁卯賢書毅然有紹明正學之思人以爲循吏之報方未艾云

李因篤

字子德一字天生富平人

陳素中傳



先生諱堯道字素中三原永清里人家世孝友力田先有諱恭者於正統時出粟賑饑曾王父及王父皆爲儒修長者之行太公諱訓號奉菴隱於賈動口舉足必念青天市井因咸稱爲陳青天云先生少負儁才讀書博覽旁及藝能與石進士隆結盍簪社皆一時知名士時藝之餘兼及詩賦古文詞同人皆後先取科第先生以諸生屢試不遇然先生素性恬退亦不以爲意也居常野服氈帽足跡不至公府然名噪一時前守李公敦請教其子弟未幾以母病辭歸侍養及母壽終時關輔兵荒先生哀毀於擾攘之中情文備至自是絕意仕進於書無所不讀朱黃二毫時不去手其中尤粹於醫癸甲之際中原鼎沸先生立廣濟齋於市一意濟世活人有迎之者無分貴賤無替寒暑風雨有東垣丹溪之遺風焉先生之醫初從事於雲間李士材三



書而神明變化剝其蹢駁舉其蕪穢以及他醫籍無不啟其鑄  
鑰入其堂奧因作傷寒辨證痘疹辨證二書行於世太公違養  
後於胞叔諱語者解衣推食三十年如一日下至羣從昆季以  
及疏屬姻親賴其噓植亦無不得其歡心先生丈夫子三長君  
顧青諱嘉績次君孚青季君祇和亦憶太公每念青天故皆以  
青字之長公癸卯舉於鄉累困公車維時軍興孔亟捐例宏開  
長君冀升斗以隆孝養遂入資而探符得濬縣濬畿南巖邑也  
歷來派一科十先生諭長君曰一則一二則二毋令滑吏牽鼻  
以無藝累窮民也編審冊中有女名詢知民之無後者苟有女  
則令出錢應差先生諭長君各報男丁盡除冊中女名歷來積  
弊一清而丁亦無缺額長君居濬而吏畏民懷皆先生教之也  
先生誠敬以孝享惇睦以善俗以戰兢慎獨砥後賢以躬行實



踐砭僞學神明堅悍老而不衰端坐隱几坦然委順蓋篤實光輝好德令終之君子也既而以覃恩贈文林郎贈濬縣知縣及長君爲御史又以覃恩贈奉直大夫掌江南道事貴州道監察御史褒美光榮澤及泉臺荆山子重先生故畧述所聞以傳之

李

瀛邑令見邑志

### 重修三原縣志序

國有一統志省有通志郡有郡志邑有邑志其體大者崇簡小者務詳史家於是焉博稽覽古者於是焉取信弗可苟也三原古內史地東清酆西孟侯北白鹿遂以三原名苻堅於是置護軍也後魏罷護軍置三原縣縣名於是始形勝面涇渭枕崑崙仲山清河翼帶左右洵關中靈秀區代產偉人奇傑之士自北魏以來諸先賢何可勝指我國家蕩平宇內甯一窮邊海隅



罔不被德意宣布教化況中天下古畿輔地前代流風遺俗所  
在施政則易從化無難於其邑之利弊弗陳激勸弗行是蔑官  
而廢典也成化朝端毅王公因三原舊志更網羅古今屬筆毘  
陵朱昱字懋易者以成書計卷十五計目五十九因鏤板時有  
私人僞作之文後知縣林洪博請於王公再增損釐爲十六卷  
而目亦加益焉未成刻主簿趙昂知縣王堯臣相繼竣其工時  
在正德年邑之舊聞乃班班可考也後人又或相繼續有嘉靖  
十四年以前宦蹟科目萬厯崇正及 本朝一二事缺畧遺亡  
者可勝道哉自正德後非王公之定本迄今百幾十年失於編  
載而前志歲久板亦滅漫難考矣余甫蒞三原取王公所定志  
讀之慨然於前之雖傳而幾泯後之欲傳而莫考於是訪邑之  
博雅君子求其說而傳述之乃得邑孝廉溫德嘉貢士焦之序



二君之草創更爲之博按其說於前志則訂補其或謬與遺而  
翦其繁縟於今志則考核其有真與僞而載其不可已更定款  
目從其類爲比附得卷七目七十有五俾各次第有所考疑者  
缺之信者傳之至於見聞有所未逮則姑以俟諸後人誓意以  
足取徵弗之有苟而且於邑之利弊與所激勸爲務不徒詳其  
說以給博聞已也志成乃敢出其述之之意於篇端與其述之  
原流始末以白而其中所竊自裁則未知其盡有合於古人及  
今與後之君子爾也

張象魏

邑令見  
邑志

### 創建普濟堂序

杜子美詩安得廣廈千萬間大庇天下寒士皆歡顏識者謂推  
其意卽伊尹一夫不獲時予之辜也然而博施濟眾堯舜病諸



期其實心實政循序可行者莫如文王治岐自鰥寡孤獨始我國家累洽重熙四民樂業皞皞乎老人擊壤童子含哺物靡不得其所恭稽 令甲各省州縣設立養濟育嬰等廩溥哉

皇仁功高覆載矣原邑夙號殷繁富商大賈履厚席豐甚至踐曳綾綺狼籍膏梁而窮民無告者求尺布斗粟之沾而弗獲蓋莫爲之倡有善勿舉也甲申九月紳士王珵鍾等公請建立普濟堂前署令陞任甯國司馬龔公據議規條以上憲語褒嘉未及部署越月而象魏下車乃卜南門外隙地分建二院男女異室器用畧備日米月薪夏蓆冬絮病者給藥故者輸棺一時踴躍樂捐者三千餘金土木工外餘俱交商行子母權永垂勿替落成集眾庶而籲言曰此都人士之任卹睦婣膏爾桑梓者也此名 大憲之惠養義使化先馮翊者也 聖天子之太平



有道美利不言者也爾等沐浴咏歌敢忘所自哉試爲爾箴以  
代斯干其敬聽之箴曰天何炎涼地何滄桑豐歉由人命不干  
常積善之昌富厚康強積惡之殃貧賤憂傷惟勤可以祛怠荒  
惟儉可以養惇龐惟孝友可以保豐穰惟詩禮可以慶綿長儲  
贏時之朽貫裕歉後之空囊惜少年之揮霍防耄老之郎當慎  
毋憾造物之偏爾斯也益當體 至人之參贊化育無窮境  
亦無盡藏生斯時食斯德彌追仰夫周京之遺澤而媲美於惠  
鮮懷保之文王僉曰旨哉盍譜綴而爲之序

### 重修學古書院記

學之名曷昉乎上古聖人觀天文察地理遠取物近取身別無  
所謂學也自尙書稽古帝堯稽古帝舜稽古大禹稽古皋陶於  
是心學在一廷矣迨後去古漸遠易見知爲聞知則非學無由



入至殷傳說特揭之曰學于古訓乃有獲而學之義始大著周公曰學古入官又爲于古士大夫以上立一標準原伯魯之辭霍子孟之傳皆質於古者也孔子生知惟是信而好古竊比老彭子輿氏歷說梁齊言必稱古琴張曾皙諸賢其志嚶嚶然曰古之人古之人甚矣夫事不師古卽不學牆面也三原古周京地代有學人元延祐年義士李子敬等捐緡五萬築室城西北隅顏曰學古書院元末廢而旋復我朝令甲郡邑均建義塾卽其基而肄業焉甲申孟冬余宰茲土謁其師鮮山斗也鳩其徒類晨星也登其廳廡茂草歌也覈其米薪權輿慨也於戲實之不存名將焉附學猶殖也不綦落乎迺取眾謀集羣力不期而樂輸者輒累千計增閭廡若干廈置膏火若干緡延碩儒選俊彥今人與居矣復古人與稽藏修焉游息焉弗懈而進於古



庶於傳周孔孟之旨差有符焉者爰製學古箴爲爾諸生勸箴  
曰古有經學說者經經易宗朱邵可逸焦京書本歐夏九峯集  
成轅韓毛衛序註縱橫三禮三傳百氏爭鳴雕蟲辨鼠地察天  
明豈徒論語堪致太平拗或變法癖能知兵藏之在笥著則連  
蔓學古經袖坐擁百城古有史學纂者矻矻馬班遞精蔚宗爲  
傑蜀魏失倫陳裴差潔世說語林恢諧奇譎蕭沈雖豪李姚亦  
雜擁妓張燈揮毫潑墨誰及廬陵克嚴紀律宋後卑靡魏前穢  
劣譜溫國編持考亭筆學古史裁彰瘡萬葉古有理學道統攸  
崇太極圖裏穀苗種中且教尋樂須解正蒙院標鵝鹿銘勒西  
東門深冬雪座滿春風南州闕里中嶽伊嵩闢揚善惡辨陸異  
同守兩齋約嚴四勿功良知自誤一貫胥通學古理宗德潤氣  
充古有藝學多能餘緒嫻禮絲莚審音秬黍四鍤若樹六轡如



組濡手鵝籠點睛龍舞洛下量璿堯夫測矩三絕鄭顧入法虞  
褚彈出魚泉翻來藥圃理數咸精行文並舉慢作園窺羞工墅  
賭學古藝林材長技普於時環橋觀聽者舉欣欣然望古情遙  
願終始典于學也請補貞珉以毋忘此志

新建綠莎行署記

縣北四十里曰陵前鎮以唐康莊二陵得名下臨酆原接壤祓  
禡乃通延榆等郡出邊之首程也唐以前守園幾何屯軍幾何  
廬旅幾何歲巡月獻綺布星馳往來貴游更不知甲第幾何驛  
郵幾何矣余以甲冬宰原因公赴鎮湫隘囂塵竟無憩息之所  
每思過客停驂履橋霜賡店月或望門以延並心搖搖無終薄  
爰喟然曰周制五禮賓居其一外傳云賓至關尹以告行理以  
節迎之候人爲導門尹除門司里授館餘及積薪監燎獻餽陳



芻物罔弗備是以出乎其塗者無燥溼寇盜之虞單襄入境而  
譏陳子產毀垣以誚晉舍館闕如亦余有司之責也乙酉維夏  
大有麥秋鳩工庀材擇隙地而廛焉閭廈若干廚廩粗具顏曰  
綠莎行署庶幾五馬南來雙騶北去信信宿宿所至如歸耳後  
倚社倉瞭守鞏固旁卽國學王君濂宅俾司管鑰踵事擴充以  
俟君子落成繫以歌曰昔我往矣靡所止居今我來思夏屋渠  
渠適子之館兮言秣其駒彼候人兮畏此簡書

重修縣治大門記

余素不審形家言或云義取之易闔戶坤闔戶乾六子定位利  
用出入謂之神或云義取之禮中央黃土主乎中雷戶門行竈  
環衛協宜不越洪範五行者近是原治自昔至元間徙龍橋鎮  
之東街幾五百載矣易晷遷閭隨時建置第弗深考甲申之冬



余宰茲土或云歲次乙酉白水中宮於五黃大門不利應在月  
午洎孟夏下澣吏人弗戒於火首楹三閒燼焉或云前令蔡君  
時署亦災宅門丙向宮星未洽亟宜更諸余聞子產之告裨竈  
曰天道遠人道邇又聞富父槐曰無備而官辦者猶拾藩也署  
門闔邑觀瞻出入總滙備豫不虞其曷可以不慎迺爲捐俸重  
修壘以甃城上建樓廡軒廠鞏固號房不宜嚮南班房不宜逼  
砌均爲移置得所而宅門改豎於巽隅卽日者稱最宜坎宅者  
也大雅綿之章曰迺立皋門皋門有伉迺立應門應門將將朱  
傳曰伉高也將將嚴正也今之縣擬古之小侯高且嚴正義取  
之詩鼙鼓三旬民不知役落成紀顛末於左古者新作門亦書  
義又取之春秋

重修三原縣志序



有信史有穢史筆則筆削則削是非不謬於道議論不淆於俗此信史也好惡徇一己之私褒貶隨眾人之意權衡莫定好醜雜登甚或受金加榮索米立傳此穢史也故作史者不獨有才要兼有聖賢之學問與識力然後可以勝任而無難郡縣圖誌亦史體也大之則天文地理散見於中小之而一名一物亦必確有義類所歸而後筆之於書可以信今可以傳後固非徒爲虛襲之具文已也原邑自周秦以迄漢唐密邇京畿名人勝跡何可備載乃自漢以前僅有傳人非僅有之夫有傳之者也不必藉此而傳也詩書之間可攷而識也北宋之盛何以亦無傳人豈無傳人夫非書策之遺漏者多歟此元和十道所以繼三輔黃圖而作也三原邑乘自康熙乙酉山陰李公修後甲子一周天道變於上人事遷於下竟未有過而問津者倘再遲之又



久老成凋謝書帙散亡後生欲求往事不免追前跡而感慨問遺編以無存已耳夫古使者輜軒所經輯其山川民俗政治得失歸而上諸朝廷以備方州之軫問矧官斯土者版籍是司安得而辭諸魏不敏承乏茲土雖諸務未嫻而興廢舉墜夙有成心自甲申到任殊不量力凡所以哀憊獨振學校創制客館新建縣門亦既次第舉行矣而尤難其事者惟志書之修曷難乎爾難乎眾志之僉同更難於秉筆之得其人幸也有勇於從事不吝捐貲者若而人有眼明如鏡下筆如山不瞻徇於蚍蜉之異議而獨斷獨行者若而人數月之內補缺訂訛整整就緒雖山川不異城郭依然而一經洗刷煥然改觀覺山川亦爲之壯色也人物之已往者不敢輕爲刪除後來者要必求其實際或爲之點綴數行畧加色相則頰上三毫傳神阿堵而人物亦爲



之生其光采也至於著作名篇擇其尤雅者分置於各類之中  
不使襃積於一函則如散錦如列采而滿目琳琅令觀者賞給  
不盡也究而言之夫亦傳其所可傳所必傳與夫宜傳而久不  
傳而不傳其所不必傳不當傳與夫雖傳如弗傳者而已他何  
長之足擅歟王震川云揚雄識字今誰及疑義須煩一一裁蘇  
長公亦云門外想無千斛米墓中知有百年人信史耶穢史耶  
識者必有辨之乾隆三十年歲次乙酉嘉平月吉旦

崔龍見

邑令見  
邑志

學古書院增膏火記

書院所以廣學校之所不及始於唐盛於宋至我 朝文教覃  
敷推廣風厲於是乎徧天下然亦惟省會規制有常州里下邑  
時興時廢蓋其初執事者倡之賢士大夫佐之久而不得其人



則不免蠶食銷沈近如關中名區隆萬以來羣居講習之所一  
邑有三四焉今皆淪爲荒烟蔓草或且並其跡而湮之惟狄道  
書院創於楊椒山先生至今多士盈庭中肖公像環以臺榭竹  
木號爲勝地大吏過其境必往謁焉其歷久不廢者有故漢元  
成閒謂孔子布衣養徒三千先儒不以爲然然朱子以脫粟飯  
學徒則不虛也忠愍有見於斯廣購學租不獨秀良者旣富方  
穀寒峻借以贍其生者亦夥矣夫人材有盛衰時俗有隆替當  
其隆盛造士有方師若弟互相祓濯歲入皆爲善之資值其衰  
替則亦有柳州所云利其口食者相持歲額於不墜此所以歷  
數百年常新也學古書院建自元義士李子敬後廢爲三官廟  
王端毅言於陳臬婁公謙復之萬厯中始建貢院拆徙書院薪  
木繡衣傅公振商檄縣重葺康熙閒邑名流杜蒼舒與鄉先達



訂觀文社振興古學雍正甲辰督學王公謦捐俸招八十人肄其中皆稱極盛終以無恆資不久而輟乾隆丁亥知縣事今興安刺史豐山張侯慨然念之倡置膏火主講席者數逾坤之策侍函丈者月僅數銖昔朱子云士之生計不得與農工商者齒乃欲聚而教之安能終歲裹飯而學於我斯言洞中時弊不敏權知經月上顧前哲仰止生慕下視城闕嗣音興懷見有捐賑餘帑可以飲院中者千九百金併前政之給商運者合沿渠官租歲得息六百餘喜曰是足有爲矣詢謀僉同請於學憲劉公延名師主講席脯貲二百正課月廩二十四銖附課半之官課前茅獎以十二銖下及司閭執爨皆如舊額足以代耕猶有不盡支傾補漏於茲取焉出納筦於老成不經官胥其詳則書之牘藏之有司揭之碑陰庶幾彷彿狄道之意可以封植永久乎



此邦士鼓篋而來攝衣而升得以無營於外而日遜其業入瞻聖賢之儀容退習四術六藝之方策他日立朝建白其本已端於是矣若夫爲學之方則白鹿洞規具在不復贅云

九畹文集書後

三原劉九畹先生理學治行名天下顧與余爲忘年交余不敏無能爲役然不可以無言也九畹之於文以博學宏詞舉矣於行以陽城馬周召矣於儒又暨諸耆宿以經學與安車蒲輪之選矣其以儒術飾吏治卓卓有聲績可紀朝野莫不知之何事余言然有說焉往者泛舟具區見夫洪波驚濤激若雷霆潮汐奔流一瞬千里以謂天下之無盡藏者莫大於是及風水相遭爲淪爲漣如織纖縠如繪素鱗又何親切而可玩也關中八水交流清濁相入重洲旋瀨蓋亦有至文焉九畹與余殆猶風水



之相遭乎余權知數月與邦人士相過從甚落落也九畹不以爲陋而辱教之且申之以詩云守令親民心自念朝廷命吏意何如其所責望遠矣黽勉從事愧無以稱更乞其舊所爲論述而卒業焉浩乎其未有津涯也夫河海不擇細流余答九畹見贈詩有理學儒林今碩果之句似能發明其意蓋維持道脈探幽抉薈經義詞章乃衛道之餘事昔賢所謂養其根而竢其實加其膏而希其光又所謂取道之原旁推交通而以爲之文也雖然余詎自謂知九畹哉願以質之世之知言者

李元春

字仲仁號時齋朝邑舉人

李善人傳

李善人者三原東里人也名廷佐字輔臣別號右亭先世無顯宦而家以素封多隱德至善人其行義乃著云善人孤子無兄



弟少未獲專儒業弱冠後卽經營家計嘗適蜀視賈事遇重慶饑道殣相望心惻然輒傾囊數千金賑之而故匿其姓名後有司廉知之上其事得賜六品職銜善人弗喜也居成都三義廟街災火延數十家男女多裸體奔善人聞陰使人人予之一金已而感恩者皆知其實爲設木主於會館題曰西秦李善人某歲時拜禮焉善人聞又使人陰毀之而邑人仍復奉之其於鄉里戚族救荒歉完逋租恤孤寡立學校修橋梁施棺槨蓋率以爲常有不可勝紀者家築室夜聞呼賊甚急持杖出見有伏牆下者就視之素所識也駭曰子耶而眾索賊者皆來紿曰賊南奔矣眾去急命其人北逃他日人問之終不以名告涇邑有年少習賈者遺五十金覓之不可得思投繯善人聞封金如其數命送之云拾得之道中遺金者視之知其非不肯受亡何有將



其原金來者薙髮賤工也問之曰小人有母謂小人曰李善人未嘗拾金乃自出金以活人命吾子獨非人哉一時遺金者及旁觀聽之皆感歎至泣下也善人早失怙成童時方讀書忽有戚容母詰其故淚乃潸然下曰兒何不得侍吾父也遂於墓傍爲廬居之後母歿亦居墓三年極哀毀盡禮此皆其天性然耳嘉慶元年 詔賢良方正邑紳謀以善人應蹇然曰此曠世巨典吾何以堪固辭之十四年年六十五以疾卒弔者徧遠邇有子一名應運郡庠生

論曰吾里有劉善人大受可亭其行事津津在人口今觀李之所爲多與同者仲尼嘆善人不可得見秦中乃見兩人誰謂世不如古與或以兩人皆擁厚貲其爲善也較易然世之擁厚貲者眾矣何皆不以善聞且兩人均未學而所爲乃與古合詎非



其質之美哉世又言富者貧所忌如兩人人不惟不忌之而且  
爭以善名歸之此亦見人心之皆善也李之事他勿論其脫盜  
與代償遺金何減東漢末陳太邱王彥方諸人獨怪雍髮者何  
知竟以李之償金出其金不肯私則善人之所感良多矣內翰  
星菴建北與善人同族爲予述其事使著之予久聞善人名星  
菴亦不妄稱故次其言爲之傳後之覽者又必有感而興者也

原故文錄一卷終



泉姑交親一卷終

也

一

二

三

四

宋書金乃自出金以招人命者予得非人哉時道金者文

男親之皆感致至泣下也善人早失怙成童時方讀書忽自

感母語其故淚乃潸然下曰兒何不得侍養父也遂於慈父

墓下築室居之朝夕必哭哭之聲聞於里人里人感其孝

元年正月旦鄉人以善人感其孝曰此善人也

善亦不受縣姑定其言為之勸勉之豐者父必待慈而與善

星華與此與善人同勉為子故其事勸善之千人間善人各星

收資以李之勸金出其金不肯味恨善人之祖慈更矣內解

與升勸金而越東斯末刺太胆王資式請人爵到燕邊善

年以善谷觀之此亦良人心之習善也李之畢此以歸其親

其賢之美姑世父言富皆貧祖恩收兩人人不辭不忍之而且



補康 海 字對山號靜  
西武功人

### 光訓堂記

夫父祖以產業付子孫其弗守者多也況乎以道以德而訓其子孫其子孫苟無佚其遺書亦已鮮矣況能身體而力行之又進而上達於古昔聖賢之所訓使其身爲聖賢之徒而爲父若祖之道無怨無恫當世之人觀之而興起後世之人仰之而不忘非豪傑之才明哲之操其孰能而幾也吾友谿田馬先生伯循以光祿卿得告於家繕其先人之墓爲堂以修祀事今年正月二十七日值先生初度之辰予往壽焉因便謁墓飲於東序堂尙未名先生請予擬之曰名當以光訓先人之道先生若之先人之訓先生遵之幽宅之祀此堂麗焉名非光訓殊於不可於是涇陽諸生遂請予爲記刻之堂下予惟馬氏自靖川先生



躬耕說道尙志慎修不求聞達罔就辟舉其高風述德視區區利祿之徒奔走役役卒無分毫之益加於上下者詎止天淵也雲巖先生克承先業出厥緒餘式諸多士美大已集匿先闕發使其道至谿田先生益暢益肆景慕滿於士林名實昭於宇內明興百七十二年其以道鳴天下蓋惟三四人河東薛先生德溫涇野呂先生仲木與先生之外醫閭賀先生克恭蓋亦其人過此非予之所知也夫學士大夫日誦說周公孔子之道得以成己成物尊上而裕下也乃騰布口說挾道飾姦此其人雖三尺之童唾口羞道乃又著爲邪說指斥前進東橋顧先生華玉送涇野先生序文其萬年公案也若谿田先生非所謂克光先訓者耶薰蒿悽愴之餘俯仰無愧君子之道若是焉可也後之觀者其有感於予言也夫其有罪於予言也夫



原故詩錄一卷

知縣焦雲龍鑒定

邑人賀瑞麟編輯

唐

宋之問

字延清  
宏農人

答田游巖

家臨清谿水谿水遶盤石綠蘿四面垂裊裊百餘尺風泉度絲管苔蘚鋪茵席何當遂遠游物外候逋客

韋應物

長安人後爲  
蘇州刺史

高陵書情寄三原盧少府

按沈作誥撰應物傳云應物  
嘗爲京兆功曹攝高陵令

直方難爲進守此微賤班開卷不及顧沉埋案牘閒兵凶久相踐徭役豈能閒促戚下可哀寬政身致患日夕思自退出門望故山君心儻如此攜手相與還

張

籍

字文昌和州人  
歷官國子司業



三原李氏園宴集

莫春天早熱邑居苦囂煩言從君子樂樂彼李氏園園中有草  
堂池引涇水泉開戶西北望遠見嵯峨山借問主人翁北州佐  
戎軒僕夫守舊宅爲客施榻筵高壤有餘滋竹樹芳且鮮傾我  
所持觴盡日共留連疎狂不偶俗常喜形體閒況來幽棲地能  
不重笑言

宋

歐陽修

字永叔廬陵人諡文忠

送王尚喆三原尉

初仕便西轅驪駒兩佩環山河識天府風雨度函關桑柘千疇  
富人烟萬井閒欲爲京洛詠應苦簿書閒

明

李夢陽

字獻吉號空同慶陽人

王公壽詞三章



軒冕兮巍我公之進兮羣龍委蛇公今何所兮南山岩巖誰與  
公兮逍遙

南山何有兮其雲油油出覆四海兮歸抱一印公朝攀兮莫與  
游徜徉宇內兮復安求

綠桂兮丹阿公遊兮醉歌幅巾兮鷺羽婆娑兮公舞壽且康兮  
慰我民望兮

贈秦封君歌

秦司倉昔仕淮安之海州倉中豆穀無秕朽抱關擊柝古不辱  
大纛高牙我何有解組歸來頭尙黑年年耕釣我山口君昔在  
京師逢故人一妻一女同一裙君令室人解裙遺室人之心先  
得君君昔在江西故人卒負骸旋喪行且哭威甯老臣求姓名  
使人問君君不告正陽舟中有貧士君召同眠食同簋後來邈



近那得知誓死酬君誨君子君之子翻飛上青雲一朝馳傳過  
閭里故山花木生餘芬他時移勅還移誥要識封君是隱君

康

海字德涵號對  
山武功人

寄伯循

近聞開講席繇蕞授諸生古道慚章句時聞何重輕致知原有  
法格物本研精今日章縫士勞勞惟釀名

三原拜馬處士丈

門前翠竹上千霄院內青松色未彫種樹年年收棗栗看山日  
日伴漁樵明時不作河陽尉樂歲聊爲汜上謠鶴髮青藜真自  
得瞻依甯惜馬蹄遙

寄張士元

黃金臺上雲依依黃金臺下水瀾瀾臣今萬里去辛苦安可辭



但願陛下壽萬歲使臣萬里無遺思祖宗洪業際天地尺地皆  
土人咸臣之斬刈流徙惟上所爲遐方炎炎有肉不可食有酒  
不可卮況臣侍從邇文墀心之徬徨豈在此惟願陛下有長期  
陛下神聖古帝少臣心不爲遐方老

王九思

字敬夫號漢陂鄆縣人

給事中張士元謫貴州驛丞夢神語之詩聊紀其事

張君憂國如賈生感激獨坐雙淚橫朝持諫書奏天子要使四  
海之內一時歌太平諫書滔滔太切直天子覽之勃然變乎色  
烈風震電不可已夕貶瘴鄉萬餘里明日稽首辭闕庭西風灑  
淚何瀾瀾臣去一何輕臣身未足惜只恐反覆閒周行生杞棘  
瘴鄉到日如中國扶持盡賴神明力遙向滇南望北辰不見長  
安還下泣夜窗隱几愁多夢耳畔新詩誰朗誦孤臣一日腸九



迴獨有神明爲爾痛孤臣舊是玉坡仙青雲仁看來翩翩天子  
見之爲歡顏淚痕拂拭衣袖乾

何景明

字大復  
信陽人

題宏道書院

梁棟起層雲松筠散夕曛九竇瞻太華清渭接河汾冠蓋時時

集絃歌夜夜聞登堂持節印衰薄愧斯文

時爲  
提學

過馬谿田村居

宛宛清河曲團團翠竹村臥龍元勝地容駟已高門野曠嵯峨

出天寒雲霧屯何時還過訪無限欲相論

喬世甯

字三石  
耀州人  
提學

商州訪馬谿田

時歸隱商  
山書院

避諠辭渭曲卜隱得商山黃綺今仍見紫芝能駐顏行藏舟不



繫沖舉鳳難攀爲問草元室何人數往還

馮從吾

字仲好號少墟長安人

詠谿田先生

卓彼馬光祿聲望高山斗弱冠崇理學平川稱畏友立朝無多日強半在畎畝富貴與功名視之如敝帚垂老學逾虛一步不肯苟吁嗟如先生百代名不朽

王世貞

寄司徒一齋溫公

太真名輩許誰如況是追鋒有召車全越已收文種治大農能廢計然書阜囊膽落傳應久白屋神交意不疎欲買豚肩趨道左恐煩軒冕狎樵漁

楊恩

舉人



贈雒依仲

于仁號

敢將赤手批龍鱗志在匡君不愛身四海斂容讀諫草九重屈  
意降恩綸近來天地憂多事此日江湖評有人未可便尋涇水  
釣溥天重望在天民

國金

銑

淮安人廣  
信知府

三原八景

神龍潛處水雲腥潭上長橋誰作成日落粼粼金柱動霞飛閃  
閃玉虹明濟川只訝雲中度乘月還疑鏡裏行獨怪尋詩歸去  
黑馬頭燐燐樹霓旌

龍橋  
飛虹

縣城直北是浮山山色空濛夕照閒背日翩翩雙鳥度穿林默  
默一僧還烟橫半嶺爲蘭若雲破重巖見菊斑待我粗酬明主  
後拂衣歸去且投閒

浮山  
晚照



天齊迢遞入雲中中有靈湫湛碧空一鏡冷涵高葉靜層波輕  
漾落花紅祠供祀事千秋在澤及農家百世同故老相傳是龍  
窟龍歸長是雨濛濛

天齊  
靈湫

縱目神泉雲正生鸞翔鳳翥應文明浮空作雨濛濛溼出岫隨  
風片片輕聚散經年流玉葉賡歌此日振金聲何人乞我詞林  
筆一爲清朝頌太平

神泉  
祥雲

浮陽百丈古靈湫常有晴霞在上頭一縷遠隨孤鷺去九華細  
逐五龍遊龍光秦苑花枝曉妝點唐陵樹色秋臨眺只疑朝覲  
處早霞流彩護珠旒

五龍  
霞光

乘興聊從大化遊山中佳致勝瀛洲秋琴隔座彈成調僊樂通  
霄響未休一部風泉翻古雅數聲鳥哢答深幽感人不異聞韶  
樂豈惜輶車半日畱

大化  
仙樂



一派清流自華原六渠分堰灌畝田霏霏入夏涼生雨漠漠迎

曛淡抹煙騷客品題成故事農家歌舞卜豐年相看忽動滄洲

興欲傍蘆花著釣船

清谷  
烟雨

邑中古刹更無倫物換星移幾百春晃日龍宮金錯落撐空寶

塔碧嶙峋數閒禪屋松全掩一片殘碑草半堙莫怪登臨不歸

去獨憐金粟是前身

金輪  
古寺

駱復旦

邑令見  
邑志

### 清峪口看杏花歌

永和三日大會來山陰千祀生莓苔長天大地靡日月誰復勝

地相徘徊堯夫先生

梁君陽封君書  
舍自署安樂窩

越方格躬耕谷口把周易

元方

梁子愷  
孝廉

校勘季拾遺

梁仲琳  
都諫

阿咸

梁木天  
進士

更進金閨籍散

髮酣歌汗漫遊顧謂使君中散儔大呼仲客集賓客風期豁達



誠難仇焦穫之東涇水北杏花灼灼被山麓嵯峨集雪屏障寒

大觥小罍紛追逐坐中何人稱最豪角里先生張儀昭封君眉髮高

王郎金鉉石郎仲昭並奇士衙官屈宋差劉曹已聞白也詩無

敵李愚谷進士停觴載奏飛卿曲溫與亨溫公虞白明府攜妓譙東山王

孝廉趙仲長結客酣醺醪薛卿國華拔劍手數捫蕭王景皋洛

社並稱尊劉宴轉運馬尊德成陳迹趙生元深茂才新論驚心魂同

時更有杜陵人恆燦行歌落魄無等倫眼中四時胸五嶽手握

巨斧開青旻三原護軍行太息高歌雅唱傾今昔潦倒追隨事

勝遊遠風瀾漫交青陌清峪之水流湯湯大堤無歲無奔忙山

川那能長不改蘭亭禊事今輝光酒酣秉燭呼歸去飛花點點

侵行馭郎官此地夜曾來外史千載應知處

別三原



四年作宰漫相羈秋老言歸淚拂衣親病已驚扶旅櫬君恩猶  
許傍漁磯鑑湖露白千家曉清峪花寒一雁飛此去故園荒徑  
在加餐相訊莫相違

鄧漢儀

秦州人  
鴻博

房貞靖祠堂雙白松歌

狂烽一夕來陝東黃巢突據咸陽宮忙捉衣冠供僞職酷烈如  
在湯火中薦紳罕守冰霜節名士爭誇翊戴功樞部房公聲嶽  
嶽賊欲羅致情真濃詎知公也心若鐵肯將勁草隨秋蓬垢面  
赤脚衣袖裂竟日奔走荆榛叢食絕淚枯皮肉盡誓將一死酬  
蒼穹令子裹屍夜半葬鄉人焚紙青山紅議諡議祠議碑碣三  
秦人物茲孤忠祠前何物堪偃蓋鄰邑遠移雙白松白松秦地  
最難活土氣高亢鮮冲融廿年霜摧塵霧滿轉訝體勢彌崱嶭



如雪如玉如鶴鷺枝幹蚴蟉顏菁葱渾疑密縣之所植黃帝三  
女遺跡同颯然青天雜雷雨或若幽澗鳴絲桐崢嶸蕭瑟不可  
狀髣髴神鬼憑高空應是我公浩然之正氣鬱結草木凝清風  
武侯之柏蔡公竹繇來感格非虛名使公尋常作仕宦松亦化  
作柳與楓安能森然若襄鄂之羽箭良相之冠珮千載而相從  
長公燕邸苦相憶亟呼韋偃圖雙龍並索詩賦與敘記擬傳勝  
事於無窮我爲作歌志景企何時游秦拜公之祠兼拜松

王士正

號阮亭  
新城人

題孫豹人小像

絕礪長松不世情科頭箕踞一先生胸中硯礪無人語落落琴  
聲大蟹行

李因篤



答杜蒼舒

河澣風高阻釣綸  
隔年書札悵離津  
長教五岳留羈旅  
偶得雙魚報故人  
蕙草未寒焦穫月  
桃花空劇杜陵春  
幾時卻逐青驄去  
尊酒狂歌託後塵

梁木天補安肅奉柬

自關中臺路誰高  
左掖名時方勤茂  
宰地復邇神京旆  
轉雲霄  
合風驅駟職輕肯  
要皇甫去郊郭問  
新耕  
下馬長林霽開罇  
落日斜裝須連暮  
雪到及種春花易  
水清無  
滓郎山燦若霞北  
征久顛顛天際望  
仙楂

許孫荃

字泗山合  
泥人提學

池陽卽目

天澗供晴望  
鄼原高入雲  
兩城相對峙  
一水自中分  
山樹皆秋



色人家半夕曛何當田萬頃今古足耕耘

中秋三原考院對月

微風拂桂叢滿院馨香發昨夜逢疎雨輕塵坐銷歇山川變素景時序生華髮天闌雁聲遲宵長蟲響聒無事且銜杯空亭看明月

池陽三先生詠

王端毅公

嗚呼端毅公崛起盛明時致主懷曠古許身必皋夔險夷豈一途中外惟所之晚節位臺鼎休休爲襟期同升太平業不植桃李私吾道光宅倭大臣諒如斯伊周前烈在韓范大名垂俯仰若符契千秋有餘思

馬忠憲公



曾讀先哲傳夙欽我公名薄涉至荀里高山空復情憶公孝廉  
日外裔咸聞聲訝其不早仕階望胎簪鳴銓材拔幽滯水鏡稱  
最平時危邀南幸受杖苦力爭及夫大難息奉母事躬耕講堂  
構嵯峨大義宣諸生朝鮮暨入奏呂馬皆國楨倫敘有弁冕謂  
宜加殊榮東還乞其集跨海爲法程卓哉儀表著何忝薛文清

溫恭毅公

公昔童子試受裁郢匠斤

李滄溟

哀然敦經術絕學責我身明理

孚眾譽踐形探其真  
嵯峨南宮選筮仕東海濱  
威懷洞所宜治績垂貞珉  
屢署皆上考蒙恩拔諫臣  
昌言抒中懷直道亦已伸  
撫浙約六章微風爲還淳  
萬里宸聽徹專官繪圖新  
再領御史臺神烏誰能馴  
抗疏方電激天顏一回春  
是時虛少海婚冠復逡巡  
公首倡大義聖慈原多仁  
竟無撓鱗志實諒公忠勤  
晚執



易退節優游清渭津講堂集俊碩著論窮天人溫溫古風儀展  
卷書我紳泰山不可見仰止增酸辛

張象魏

邑志

見

苦熱行

閏年初過五月五人畏陽烏爭畏虎東南烈烈火風發密雲西  
郊總不雨團扇頻搖折右肱袒褐還思卧寒冰碧霄萬里無飛  
鳥海底龍藏不敢升慚予爲政多失德步禱龍神百事責滿城  
金鼓鬧喧填我心如焚神耳塞風臺雪檻以避諸委巷蓬門更  
何如雖得麥秋大有書黎民薰炙恐靡餘猛然思與民更始鑿  
井穿渠雲根柢涓涓細流不足恃晝夜桔槔徒爲爾安能力挽  
天河水炎蒸散盡田禾起一向熱腸消乃已

嵯峨山



鹿原之北望屏障碧芙蓉圈沒秦非去門開古帝逢清池常浴  
日霧雨數騰龍欲振新衣者須茲第一峯

王燕龍

城固人  
邑學博

過三原北郊

地勢平如掌一灣水屈盤板橋通竹徑古木護霜灘井里碁星  
布炊煙嶺岫寒卻疑深秀處鳴鶴有飛翰

余庚陽

邑令見  
邑志

池陽變起

五月二  
十六日

花門勾結逞猿頭高塔烽連巖薛山最恨蘓祠停北郭前富戶  
捐修北  
郭已經請余祭土爲其  
鋪某阻停今乃失陷誰教趨下絕東關畸零羨卒鵬雲奮百

萬生靈雉堞環泣望三郭焚掠慘危城縱保也羞顏

練勇

北原團勇雲集富平涇陽亦有來者  
令與城勇分守堞口並隨時操練



兵單難制逆回驕弓箭全憑社裏招椎魯瞎巴都入隊芹香桂

藥各揚鑣

文武舉人生員俱爲團總

沙門敵愾惟曇讚

定國寺僧

流籍從戎有孟

瑤

時軍流犯編入伍

我愧黃州團練使日從牙帳察鳴梟

義捐

六月初局款告罄北原援勇僅各帶糧五日余正懷焦灼幸富紳各出城店資本共捐錢十一萬貫眾志

益奮而鄰團亦聞風爭赴矣

益奮而鄰團亦聞風爭赴矣

裹糧未可久操戈賊飽兵饑奈若何眾志成城須犒眾多錢善

賈果衷多字標十萬麻家貫賞給三千壯士歌

東關之捷賞銀三千

自此

鄰團爭赴救蒼頭奮擊看肩摩

出隊

七月十五日

逆回遊奕合旋分特遣前鋒誘賊羣背水難施韓信策撼山惟  
整岳家軍縱教兩翼環新月早列三才出幻雲自此團營威頗  
振池陽城外少妖氛



原邑舊志體裁不整且無序例時逾百年恐日久倍難採  
訪特設局延請梁羲初侍御賀角生明經重加纂修賦此  
呈質

秦中十志重漁洋焦穫偏無定本藏萬卷遺書飛劫火百年陳  
迹悵斜陽賀循好闡儒宗業余靖期分諫草香臺閣生風欽鐵  
面尙蘄方雅挈宏綱

蘭蕭本質自殊芳取稟宜斟宋與楊麟筆成經無史例龍門作  
讚似彈章褒譏定戒盈辭逞利弊惟期綴錄詳竝峙峩山傳不  
朽端憑心術貫三長

差務絡繹未忍攤派里民勸富紳捐辦有李輝山提舉奉  
其孀母劉恭人命捐銀三千兩備辦車馬從此設立差局  
四鄉可免苦累賦此贈之



差徭繁重苦難籌總爲瘡痍尙未瘳一自麻牌捐佛院頓教羽  
檄速星郵騷人題柱仍停馬提舉於咸豐二年捐銀鉅萬補修龍橋徵士驅車免  
奪牛多少滂民心感切紛紛雜役可長休

差局日需草料雜費無款可支籌議抽運貨車輛腳價

算車苛政豈忘旃徭役宜籌得失全不礙羽毛抽積軸

運貨出入每騾

一頭抽錢五十文驢一頭二十五文空車空騎概免

肯教毫髮擾連塵收傭藉可蠲三尺

入市非同稅一錢

但念時需資米炭還須斟酌握心權

米炭爲日用之物擬俟經費既足免抽運價

減浮費

煌煌

詔旨誠羣官亂後宜憐喘息殘三品租仍三品納一分

恩在一分寬也思薄宦茹蔬苦爭奈災黎掇穗難疑我取名知  
不免避名何得此心安



原古言金  
余居家授徒從不外出里人目爲閨女迨宦秦會審案件  
每好據理爭執僚案目爲潑婦前俱有作今任三原百姓  
以余居心太慈則又稱爲余婆何一生之貽笑巾幗也戲  
筆成此

都將巾幗奉鬚眉只爲婆心一片慈善頌深慙同杜母恤孤幾  
見哺方兒軍前幸免蕭娘誚廚下粗通白傅詩只愧姑容驕子  
慣折菱早未做頑癡

### 修渠

修渠須酌古今宜慎勿輕聽巧僞詞集費原非由降到現在籌  
修渠經  
費全賴  
捐輸得人方可免虛糜二分減料流偏暢卅日勞民力自疲

試看黃岩籌水利全憑林蔡副心期

朱子黃岩之役擇用敦篤  
曉練之宣教郎林鼎沉審

果決之承節郎  
蔡鎬共爲措置



訪賀復齋明經

爲訪清廬

授經齋名

慰渴袞角巾一見俗情融半岩洞壑塵囂遠滿

架圖書福地同試倚石欄瞻戶外直將風物攬秦中嗜深經籍

兼山水

見朱子文集

卽此胸懷似晦翁

原故詩錄終



卷之四



兼山水

文景宋

千明山觀對山觀

兼山水

兼山水

兼山水

兼山水

兼山水

兼山水

兼山水



